

松鶴山房文集

松鶴山房文集卷之七目錄

論

徵聘總論

鄉舉里選總論

薦舉總論

對策總論



徵聘總論

君臣之義無所逃于天地之間。然國家欲遺大投艱。望之以坐論燮理。則未有不自重其身而足以大有爲者也。版築磻溪尚矣。三代以來。建元之安車蒲輪。後世以爲盛事。申公雖未竟其設施。然爲治不在多言。數語不獨切中一時。而萬世論學論治之要不外焉。東漢樊英之對。近於不恭。而順帝之優容。反增盛德。嗣是徐穉姜肱先後受徵。皆盤桓不至。雖終身卒無所建明。然難進易退。峻節清標。實倡末年諸君子。

節義之氣士人之出處其關於國家亦豈少哉東晉  
崎嶇播遷之餘而翟湯虞喜戴逵先後丘園自高頻  
辭徵命獨殷深源本無濟變之才而丁艱危之季始  
則養望太優終乃損名已甚向使幸際昇平從容諷  
議恬淡修謹亦何至覆餗貽譏一至于此哉魏世祖  
起於朔漠而盧元高允游雅等皆以名德蒙徵召允  
卒爲一代之元臣庶光弓旌之典矣唐以科舉取士  
而李勣以著作郎徵其所建白亦差有可稱焉宋至  
高宗始徵布衣譙定處士尹焞皆入講筵其後王忠

民之忠節張志行之高尚胡憲之力學皆賜出身俾  
教授本郡其於勵世磨鈍亦庶幾矣元世祖中統之  
初卽召許衡劉因吳澄楊恭懿等多一代大儒雖未  
能卽究其用而鼓舞一代之人才實有裨焉明太祖  
初得劉基宋濂章溢葉琛四先生及下江南得秦從  
龍下金陵而得陳遇文學政事皆爲一代之冠而陳  
遇先後條對治道屢承優渥官以學士尚書而始終  
不受以布衣老遇不肯屈其身以受一官太祖亦終  
不以一官强天下士皆可爲千古之盛事然諸君子

皆元季播棄之餘則謂季世天下無才未敢信也嗟夫取士之典至於糊名易書其以愚不肖待天下者可謂已極乃法禁稍疎而主司苞苴士子關節無所不至廉恥之存者有幾然則訪求泉石高蹈之流特行徵聘之與其或高尚不出則加旌獎勿以朝命困之使天下望之如神龍威鳳可尊而不可狎庶乎有志之士有聞風砥礪者乎司世教者安可不加之意也

鄉舉里選總論

徵聘以待天下非常之傑。至于中材之士。則急復鄉舉。里選之制爲宜。夫鄉人好惡。原不足憑。然古者取士。必于鄉故人。于宗族親黨。所在皆有恂恂恭謹之風。而消其桀驁之氣。自專行科舉。而浮薄之徒。得次第輒陵轢其父兄。至于鄰里鄉黨。不聞有調恤之施。而反供其蠶食風俗。偷薄職此之由。乎按周制。命鄉論秀升之。司徒曰。選士。司徒論士之秀者。升之。學曰。俊士。升于司徒者。不征于鄉。升于學者。不征于司徒。



曰造士樂正崇四術立四教以造士則自王太子王子羣臣之太子鄉大夫元士之適子國之選造皆與焉大樂正論造士之秀者以告于王而升諸司馬曰進士後世進士之名自此而始而童子之試與選士同賢書之升與俊士同明時國學之設合舉監官廕皆在其中與造士同其不同者則古人以三物賓興其公論出于鄉後世糊名易書之試則其權在有司而稍具後穎之資皆得凌躡輕浮謂立致公卿我得以自主也夫三物首六德所謂知仁聖義中和者豈

可。望。之。中。材。以。下。之。人。哉。然。以。此。程。人。必。無。暴。慢。當。  
凌。得。與。其。選。者。可。知。也。次。六。行。則。曰。孝。友。嫺。睦。任。卹。  
矣。論。人。以。此。猶。有。悖。其。父。兄。驕。其。鄉。黨。而。覲。顏。自。詡。  
者。乎。至。若。六。藝。之。教。古。人。以。爲。小。學。而。聖。門。七。十。二。  
子。號。爲。兼。通。蓋。能。如。此。則。文。事。武。備。兼。優。鉅。細。精。粗。  
皆。可。適。用。豈。猶。有。迂。疎。而。無。當。者。乎。然。則。古。人。之。責。  
於。士。者。如。此。其。詳。選。乎。士。者。如。此。其。謹。後。世。徒。以。數。  
行。空。疎。無。用。之。語。取。其。明。通。而。士。亦。以。此。自。矜。不。可。  
一。世。不。得。則。詬。諍。怨。咨。不。能。終。日。欲。求。道。德。之。一。風。

俗之同人才之盛又何日之有也流俗積弊不可遽  
回人情習爲固然難以立革或者入童子試之始必  
由里鄰宗族推舉端方謹厚孝友著聞之人其素行  
無賴寡廉鮮恥者不得與試雖人情矯僞百出別有  
欺世盜名之術亦未可知然與其甘心爲匿喪捕博  
之徒寧矯飾爲割股廬墓之行至於敦實尚而去虛  
名則在主持風化之先達縉紳以身倡導而講明之  
又非徒恃法令所能變其萬一者也

薦舉總論

大臣之義莫大於以人事君。國家取士之途。自特徵鄉舉之外。大臣之薦揚。安可已哉。三代尚矣。春秋如鮑叔之於管仲。子皮之於子產。祁奚之於解狐。與子午其事皆可爲千古大臣之法。漢興而蕭何之於韓信。魏無知之於陳平。皆草昧之初。君臣無猜。得以共勦大業。嗣而吳公之於賈誼。馮唐之於魏尚。田叔之於孟舒。揚得意之於司馬相如。先後皆卓有樹立。獨至公孫弘開閣設館。名爲禮士。而史氏未嘗稱其所

舉何人其所賓禮亦未聞有所稱述於世固知虛懷  
下士爲國求賢非外寬內忌曲學阿世之徒所能矯  
飾也嗣是而鄭莊韓安國皆以好士推轂名重一時  
而張安世以所薦之人謝已則大恨而不受其私謁  
斯又大臣遠嫌之義庶免植黨懷私之謗者乎光武  
詔三公至州牧歲舉茂才孝廉而郡國守相未滿歲  
不得察舉蓋恐其延訪未真而薦舉至此亦漸有法  
矣伏湛之智略薦於杜詩謝夷吾之德量薦於第五  
倫龐參之勇略劉愷之德望薦於陳忠樊準董瓊之

樂道清亮李固之潔白忠貞薦於郎顗邊讓之通達  
皇甫規之威重薦於蔡邕皆嘖有聲稱而左雄薦周  
舉爲尚書反爲所劾而雄自言其過舉之不阿雄之  
虛受殆與范文子韓厥先後爭烈者矣晉羊祜舉杜  
預立平吳之功謝安舉其兄子咸淝水之烈祐以拜  
爵公朝謝恩私室爲非是有所進達而人不知安則  
遠衆舉親而兄子亦不負所舉斯皆公忠報國之風  
可法可傳者也唐太宗責羣臣舉賢而封德彝以未  
有奇才對太宗曰君子用人如器各取所長正患上

不能知安可誣一世之人才哉太宗之言宜乎其驅策智勇宏濟大業者乎不獨封德彝歟於一時後世人臣聞此安得不撫心而自愧也至於因常何而得馬周其虛懷咨訪至此天下豪俊何一不願輸誠輦轂致君堯舜者哉狄仁傑處女后之朝而先後薦達如張柬之桓彥範書師德姚元崇等皆身歷將相桃李一門卒成反正大業爲國薦賢如是庶幾無愧者乎崔祐甫除吏幾八百員多出知交李絳謂但問才器與官不避親故蓋心果無私故可行之不疑瞻徇

者固不得以之藉口也。李吉甫令裴垪疏三十餘人。數月選用略盡。蓋吉甫知垪之明。故可信。垪之篤茫昧者。亦不可以此濫觴也。宋初趙普薦士。補牘不休。得請乃退。蓋開剏之君臣。故得行之。此後則奸弊漸多。嫌疑亦起。天禧罷朝臣。舉官寶元。康定則罷常叅。薦舉熙寧。則併監郡。舉官罷之。然呂蒙正之於夷簡。則舍子薦姪。不以爲疑。范仲淹之於狄青。則拔大將於行伍。不以爲忌。卒之兩人皆致身將相。勲業爛然。足爲竹帛之光。他若孫忞之薦唐介。吳中復而骨鯁。



成風韓琦屢薦歐陽修而文章華國尤表楮萬里薦  
蔡元定而理學亦得表章斯皆有宋一代人才有可  
稱述者乎明初停科舉而行薦辟宋濂劉基等四先  
生率由薦舉嗣是而李文忠薦王禕徐本陳桂彥良  
茹瑋薦劉三吾秦從龍薦陳遇其文章學術政事皆  
超出一時此後科舉法立薦舉之風遂衰曹石用事  
欲倣蔡京召楊龜山故事始薦吳與弼不久而歸巡  
撫朱衣薦陳獻章僅列詞館薦者未必皆用用者亦  
不復有所建明豈非資格過拘而縉紳習尚有不可

挽之勢哉嘉靖南郊下詔言祖宗朝雖定科貢之法而薦舉亦重並列於三途今舉人無九卿之望歲貢限方面之陞田野絕保舉之路以致人尚浮辭不修實行大哉斯言庶幾洞悉科舉之弊人才之衰矣而所舉只文徵明葉幼學等以末員終隆慶命撫按搜討境內人才而趙蒙吉張弘道等以薦授國子學正萬曆初勤政求賢召舉人郭元錫等而南昌守范沐薦布衣章潢巡撫郭子章薦舉人來知德其學行皆有可觀亦止授翰林待詔蓋自中葉以來雖薦舉時

行欲比隆漢唐宋之人才一二亦不可得積弊成風  
一至於此使爲君相者大破拘攣之習以虛心卓識  
訪天下之英才自當有非常之士出而弼亮天工以  
成大業者毋徒襲封德彝之言爲天下萬世所笑也

對策總論

自漢以來對策之士或緣公卿之薦或因州郡之舉然必待天子親策之後以一日之優劣爲用舍則薦舉鄉舉之外又別爲一途矣按漢書文帝十一年詔舉賢良能直言極諫者親策之而龜錯爲高第自太子家令遷中大夫此廷臣以薦舉而對策之始也武帝建元元年詔丞相御史列侯二千石諸侯相舉賢良方正能直言極諫者親策之而丞相綰奏詔賢良所對皆治申韓蘇張之言悉按罷此則內而公卿外

而郡國兼舉之始也。至元光元年，令郡國各舉孝廉一人，詔策賢良而董仲舒、公孫弘等出焉。此由鄉舉里選對策之始也。然按董仲舒本傳，其議遼東高廟事得罪在建元之六年，則其對策當在元光之前。按公孫弘本傳，弘於建元中對策，按罷至元光五年詔徵明當世之務，習先聖之業者。菑川國復推弘弘以前不能願更選，而國人固推弘，遂至太常策上天子擢爲第一。是弘之對策在元光之五年，又非元年。漢史之矛盾多訛可知也。鼂錯所對之言，無他奇策，雖

言五帝神聖自古莫及。則躬親之。欲文帝躬攬大權。而已其文章較之。兵事之陳不及遠甚。公孫弘所對亦多膚廓之詞。唯董仲舒論災異。謂天心之愛人君。足以悚動君上之聽。嗣是魏晉隋唐以逮宋元。雖代數舉行。而人文之傳者。鮮北齊樊遜。天保五年之對。其立議正大。文章亦閎麗典核。史氏錄之。良可觀也。張柬之幼負王佐之名。其自清源丞以賢良召。年七十餘而對策第一。當有鴻論偉議。奈何闕其文乎。唯劉蕡以直言下第。較之獲選者有光。正不止桂林一。

枝嶠山片玉矣。夫士修之家獻之天子之庭。一旦得  
披瀝以効拜颺。使於當世之利害時政之得失洞悉  
於中而出之。不亢不隨。足以動人主之聽。亦庶幾以  
不負所學者。不負天子若依阿詭隨。以希一日之苟  
得。他日之立朝。又何論哉。孔文仲以忤時政不得推  
恩。牟龍應以陳國勢艱危。調定城尉。將以直言求仕  
而以直言黜之。當國者能辭其咎耶。至若褚承亮安  
國寺之被拘長揖。不忍言上皇少帝之事。較之鍾儀  
南音。尤加楚痛。又非承望風旨之徒。可同日語矣。

松鶴山房文集卷之八目錄

說

河圖圖說

洛書圖說

解

知鬼神之情狀解

答

乾象志問答



松鶴山房文集

卷之八目錄一

八卷目錄終

河圖圖說

按易繫辭傳曰。天一地二。天三地四。天五地六。天七地八。天九地十。此卽所謂河圖理數之大原也。天以一生水。地以六成之地。以二生火。天以七成之。天以三生木。地以八成之地。以四生金。天以九成之。天以五生土。地以十成之。此河圖五行生成之數也。一爲太陽。居北。二爲少陰。居南。三爲少陽。居東。四爲老陰。居西。東北陽方。故一三皆位陽。西南陰方。故二四皆位陰。東南物之始生。故二少位於東南。西北物之收。

成故二老位于西北。此河圖四象之位也。一六爲水。居北。左旋而東。則水生木。又旋而南。則木生火。又旋而中。則火生土。又旋而西。則土生金。此以其運行之序言之。左旋而相生也。北方一六之水。尅南方二七之火。西方四九之金。又尅東方三八之木。此以其對待之位言之。又未嘗不相尅也。要而論之。理數之原。一而已矣。一者太極也。二之則爲兩儀。四之則爲四象。四象變化而庶類繁生。數至四而備矣。一合四卽爲五。爲五行。故五者數之中也。自五以後。生數皆合。

五以爲成數。一合五而爲六。二合五而爲七。三合五而爲八。四合五而爲九。成數至九而備矣。而五倍五則爲十。小衍之爲十。大衍之爲五十。卽爲蓍策之數所自起。故十者數之終也。五爲數之中。故于成數之中。減其生數。皆得五十爲數之終。故以生數合成數。又皆得十。蓋太陽居一而連九。太陰居四而連六。少陰居二而連八。少陽居三而連七。就其所居之位言之。則生數太陽成數配以太陰。生數太陰成數配以太陽。生數少陽成數配以少陰。生數少陰成數配以

少陽而就陰陽老少各分計之皆得十焉此皆天地之自然非人力所能損益也萬物統乎天數始乎一乃以一二三四分屬於天地何也天地之大不外乎陰陽陽奇陰偶分之自各有所屬也五行皆生于天地乃或天生而地成之或地生而天成之何也萬物皆陰陽合而有生而所生又各自有陰陽皆由得氣之初陰陽或先或後水先天陽而後天陰故體陽而用陰火先天陰而後天陽故體陰而用陽木由滋潤而後焦枯先天同水而後天同火也金由煅煉而後

融液先天同火而後天同水也。以至人道有男女飛走之有雌雄牝牡。其先後天皆可類推也。五行之生有先後數有多寡何也。凡物之生皆自微而著。由清而濁。數之生皆自少而多。五行水最輕清而火次之。故一六水而二七火也。木則形堅金則質重。土則最太而最濁矣。故三八木。四九金。而五十土也。太陽以一爲生數最少。以九爲成數則最多。太以四爲生數最多。而以六爲成數又最少。少以三爲生數次多。以七爲成數次少。陰以二爲生數次。以八爲

成數又次多何也。生數主氣。成數主形。生數先天而  
成。後天論氣。則太輕清而太。重濁故太陽一  
而太。四論形。則太陽有餘而太。不足故太。六  
而太陽九也。論先天則陽強而陰弱。故陽三  
而。二論後天則陽主洩而陰主收。故陽  
七而陰八也。老陰之位從一二三。而不論  
六七八九何也。由太極生兩儀。兩儀生  
象。皆先天之事也。故當從生數也。筮老之取六七  
八九而不取一二三。又何也。分二而掛一而

皆後天之事也。故當從成數也。揲筮老陽取九而不  
取七。而老陰則取六而不取八。又何也。卽太陽有餘  
太陰不足之說也。而不止此也。凡陽屬天。天形圓。圓  
者徑一而圍三。凡陰屬地。地形方。方者徑一而圍四。  
揲筮以四爲數。所扞之數。以一四爲奇。以象天。以兩  
四爲偶。以象地。如三扞皆奇。取徑一圍三之義。則三  
三爲九爲天矣。天用其全。故不用七而用九也。如三  
扞皆偶。取徑一圍四之義。則三四爲十二爲地矣。地  
用其半。故不用八而用六也。且所扞者九而過揲之



數亦爲四九三十六所劫者六而過揲之數亦爲四六二十四是揲筮老陰老陽不必皆因河圖而自與河圖暗合此所以爲理數之自然也至若河圖言五行而伏羲因之以畫八卦河圖五方而先後天之八卦又皆分爲八方又皆與河圖各有所合又當卽橫圖圓方圖詳析分疏其義始見故總其大略如此得一道人曰義本前人叅以己意明白曉暢如印泥畫沙無模糊影響之談亦無牽合附會之語方是作說手筆

洛書圖說

楊子道聲洛書別論曰。洛書之數。起于一。中于五。窮於九。五建極於中。爲衆數所取法。自五以下。皆爲生數。爲一。爲二。爲三。爲四。自五以上。皆爲成數。爲九。爲八。爲七。爲六。生數與成數相間而立。以成右轉之形。夫數始于一。一合中五而生六。六合一而生七。七合中五去十而生二。二合七而生九。九合中五去十而生四。四合九去十而生三。三合中五而生八。八合三去十而復生一。運行無窮焉。而其相合相生之法。凡

奇數則合中五以生下數。偶則合前位之奇以生下數。偶從奇。奇不從偶也。奇必生偶。偶必生奇。陰陽互根也。中五建極。奇偶相生。而自右之左。法自然之運。此不同于河圖之不分奇偶。皆合中五而爲數也。至其對待之法。更有大異于河圖者。河圖奇偶重列。以相對。洛書則單列。以相對。奇對必奇。耦對必耦。以中五爲之綱。而餘數相伍。以列。及計其對待之共數。莫不各倍中五。以成十。而十已默寓于衆數之中矣。楊子道聲合前人之論。而總括之如此。其說已極明備。

今按易繫辭傳曰河出圖洛出書聖人則之是圖書相爲表裏夫子之言可據後人以洛書至禹始出其訛固不俟辨至若天一地二章所言皆河圖而不及洛書蓋緣著數取于五十故獨引河圖爲言至由兩儀四象而生八卦則圖書皆其根本而先後天八卦之位配之洛書尤其易見者也洛書自北之西一六之水尅二七之火火南行尅四九之金金東行尅三八之木木轉中尅中央之土土北行又尅一六之水此洛書之右轉相尅異于河圖之左旋相生者也至

以其相對待言之則東南四九之金生西北一六之水而東北三八之木生西南二七之火是洛書之對待相生又異于河圖之對待相尅者也要之生之中有尅尅之中有生十之數不外九之用九之數已備十之體四正已備乎四隅四隅不外乎四正四正四隅皆本于中宮兩儀四象皆根于太極此則河圖洛書之所同而竇未嘗異者要之言乎理則一言乎氣則二言乎象則四言乎行則五由是卽一奇一耦以生八卦六十四卦而先天後天爲方爲圓皆從此起



知鬼神之情狀解

原始反終故知死生之說精氣爲物遊魂爲變是故知鬼神之情狀

原者推之於前反者要之於後天地之化雖生生不窮然有聚必有散有生必有死以易中陰陽二氣之聚推其所以始則可以知生之說以易中陰陽二氣之散推其所以終則可以知死之說說謂言其理也耳目之聰明爲精口鼻之噓吸爲氣人之生也精與氣合而有物故爲神精滅則魄墜于地氣絕則魂遊

于天人之死也。魂與魄離而爲變。故爲鬼。蓋在生謂之精氣。在死謂之魂魄。離合聚散。屈伸往來于天地之間。謂之鬼神。然要不出于易之陰陽。可以知也。蓋精也魄也。皆陰之屬也。氣也魂也。皆陽之屬也。精氣爲物。陰陽二氣聚而爲神也。而神又陽之屬。則精氣者陽中之陰陽也。游魂爲變。陰陽二氣散而爲鬼也。而鬼又陰之屬。則魂魄者陰中之陰陽也。人生謂之氣。死謂之魂。乃夢中不謂之氣。而謂之魂者。蓋當其睡夢生而有死之形。氣雖未絕。而精不用。事故魂與



魄離而有夢此又陽中之陰也人生謂之神死謂之鬼乃正人君子死不謂之鬼又謂之神者蓋浩然之氣死而全生之理精雖已滅而氣猶不散故魂能舉魄而爲神此又陰中之陽也正人君子死則游魂變而爲神伯有爲厲之屬游魂變而爲鬼鬼者歸也亦漸歸於漸滅而已神者伸也在天爲星辰在地爲河嶽正氣常伸此又聖人所以貴陽賤陰扶陽抑陰之意乎而要其聚散久近則陰陽之變化不可窮詰而其自無之有自有之無則無極太極而生陰陽陰陽

本卷上之三  
仍歸于無極。此情狀可以易知之者也。

得一道人曰：宣室之論未必能到此真洩盡造化之秘者。知此則三教同歸何必強生分別。

松鶴老人曰：易學無窮。余居東時偶爲顧立庵作淺述。未敢自信也。或見此問余近世講學者好言無鬼神。却只講得子不語一章。中庸易繫全未夢見。盍以此正之。余謂此輩暗室屋漏不可對人處多。但願天地間無鬼神。非余所能正也。子謂此解頗近。似請先舉以質世之高明。

乾象志問答

客問於余曰。易云在天成象。又曰。觀乎天文以察時變。子之志乾象與史之志天文一也。然史志備載占驗災祥。子則以占驗災祥屬之庶徵。亦有說乎。余答之曰。史遷世掌天官。故史記有天官之書。稍述星象。遷謂天官家多凌雜米鹽。故存其概而已。班固病其略也。故天文志詳之。逮晉隋唐宋皆詳其占法于前。而記其事于後。夫史以志一代之事。非獨爲占設也。詳其事變可耳。至于各家之占小異大同。重見錯出。

前後相沿亦何爲哉。吾志網羅百代災祥占驗宜無不可載而屬之庶徵者亦自有說。史記止載星占而災祥附于本紀。雖不言事應而事應已具此。卽我夫子春秋之法也。班氏乃分爲天文五行二志。以星象入于天文。而以日食天變彗孛及雲氣入于五行。且分屬于五事。而詳其事應於後。至于五行之占。則又雜採京房劉向劉歆父子之說。時或矛盾。後儒病其附會也。自唐書以後。紀災異悉削事應。而天文五行之分屬。究未一正其是非。今將以星變屬之乾象乎。

則日蝕彗孛雲氣何必非天以地震山崩禽蟲之異亦歸乾象乎則此類又安得盡附于天也吾故別立庶徵一志備紀天文五行祥異而此志則止載七政之形體運行及風雨雷電之事蹟而已其關於災祥者則不入也客曰然則于象之義何居曰象非僅災祥也日象陽德月象陰刑風象政令雨象膏澤雷電象明罰勅法何一非象何一非天學者誠知無一之非天則方寸之微屋漏之隱無往非昭格之地何暇徒取風雲月露以資諷詠談笑之具又何俟疾風迅

雷而始知修省也哉客悚然而退。

得一道人曰天文五行二志分屬失倫前史莫正其  
其非至此始爲允當有膽有識

松鶴山房文集卷之九目錄

序一

紀筮序

文卿傳誄詩辭序

鐵氏家譜序

代高京兆盛京通志序

代董京兆盛京通志序

盛京通志小序二十六首

京城志序

壇廟志序

山陵志序

宮殿志序

苑囿志序

附各庄序

建置沿革志序

星野志序

疆域志序

山川志序



城池志序

關梁志序

驛站志序

公署志序

職官志序

學校志序

田賦志序

附稅課序

附官庄八旗田畝序

風俗志序

祠祀志序

物產志序

古蹟志序

帝王志序

名宦志序

人物志序

孝義志序

仙釋志序

藝文志序

承德縣志序

承德縣志小序二十七首

建置沿革志序

壇廟志序

山陵志序

苑囿志序

宮殿志序

星野志序

疆域志序

山川志序

城池志序

關梁志序

公署志序

驛遞志序

職官志序

戶口志序

學校志序

選舉志序

祠祀志序

物產志序

古蹟志序

名宦志序

人物志序

列女志序

隱逸志序

流寓志序

方技志

仙釋志

藝文志

海城縣志

小序二十六首

建置沿革志

星野志

疆域志

山川志

城池志序

關梁志序

驛遞志序

公署志序

職官志序

戶口志序

田賦志序

學校志序

選舉志序

風俗志序

祠祀志序

物產志序

古蹟志序

名宦志序

人物志序

孝義志序

列女志序

隱逸志序



流寓志序

方技志序

仙釋志序

藝文志序

蓋平縣志序

蓋平縣志小序二十四首

建置沿革志序

星野志序

疆域志序

山川志序

城池志序

關梁志序

驛遞志序

職官志序

學校志序

選舉志序

戶口志序

田賦志序

風俗志序

祠祀志序

物產志序

古蹟志序

人物志序

孝義志序

列女志序

隱逸志序

流寓志序

仙釋志序

方技志序

藝文志序

代奉天諸孝廉送曾二改序

送官子之蓋州序

田肯齋先生詩序

代張少京兆祝徐太孺人七袞壽序

送孫鳴玉序

黃叔威見山堂集序

之久。乃渙然曰。嗚呼。聖賢綜理數之全。而洞吉凶悔吝之故。教人憂勤惕厲。以終其身者。備此矣。庸他求哉。乃取前後所筮合記之。以爲考鏡。而志昏行窳。理欲相攻。莫能自勝。未敢謂於易終身焉。可弗勉哉。

得一道人曰。潔淨精微易教也。文品如之。

黃叔威曰。洞達理數之言。固與魏晉清談迥別。至其文品之潔。則又濯濯冰壺矣。

文卿傳誄詩辭序

望雪道人。居東之二年。首夏清和。時雨初霽。方編籬治蔬。忽聞剝啄聲。則僧願山自海州來。手一帙授余。蓋俠士閔君爲天津亡妓所徵傳文。及哀挽詩歌若干首。屬余一言。余按袁朱二生所爲傳文。卿小名彩鳳。本天津良家。母孀。文卿幼。誤售樂籍。稍長。明眸豔質。綽約動人。媼授以雲和業。愕不受。媼恚備極。挫辱之。文卿以母老無依。故忍死卒業。靈慧性成。霓裳羽衣一授。卽解。然雅不欲見長。常捧心顧影。脉脉凝睇。

每當綺筵四座。羽觴雜進。強爲俚曲。以應衆方。嘖嘖驚爲遏雲繞梁。而間出哀音。怨調。煩亂淒切。如泣如訴。令觀者淫淫涕下。以故貴介俠少。爭輸纏頭願締歡。文卿益介然寡合。顧獨與燕臺原君善。原君故豪士。久遊狹邪間。悉其貞心烈性。不以淫冶遇文。能曲意巧中。訂婚且有日矣。歲戊午季夏之朔。原生以千二百金爲媼壽。諸妬忌者相與尼之。媼亦以諸優藉文卿顯。一去令陽春絕唱。堅持不可。文卿計事不諧。義無再辱。乃泣與原生訣。歸自經。蓋年二十有二也。

夫青樓樂府豔姿麗曲如莫愁樊素亦遂擅場一時  
垂聲後代獨文卿以一死而風塵之垢孽蕩滌無餘  
方其受辱搗母低眉俗客時計豈須臾忘死卒之隱  
忍不死及至一遇知己從容擘畫勢窮義見無復再  
計而就死彼蓋欲身得死所也此與臧獲婢妾感慨  
自殺者豈可同日而道嗚呼士爲知己者死不偁然  
哉余獨嘆古今來貞臣志士烈婦義夫天壤間何可  
勝數而或事湮心晦不傳或傳矣而阻於山陬海澨  
不入通人紀載者又何可勝道也得有心如閔君爲



之微筆乘於通邑大都且不遠數千里而思布之遐  
荒邊裔使人傳爲口實文卿其可以死而無恨矣文  
卿事詳朱傳余重閱君志也爲約其顛末序之如此  
云

得一道人曰此等題講學諸先生不肯作今作之而  
有裨名教卽以此講學未嘗不可

黃叔威曰青樓貞節事亦可風得此鉅麗史筆  
當益彰文卿爲不死矣

鐵氏家譜序

昔漢萬石君以孝謹聞於郡國。子孫至二千石者數十人。晉王休徵弟昆。孝友。其後世皆身兼將相。族之盛。甲於江左。天性至情。初非覲報。而天道遂若左券。豈非和氣致祥。積善餘慶。固有自然之理歟。余坐謠詠譴謫。賜鐵氏諸彥從。余問字其父兄子弟。恂恂如也。僮僕訢訢如也。雅謹傳所稱長者。其庶幾歟。甲子之夏。長人太翁以其母節太孺人疾。延郡參軍徐公視脉。余代迎賓。登其堂。其子若孫皆徬徨愁悴。若

不自勝者。余方以被譴違親。萬里外不覺觸目刺心。  
搵淚趨出。因嘆曰。鐵氏其興乎。己而太孺人疾果痊。  
蓋天相之矣。嗣太翁以其叔父率吾公命序其五世。  
以來爲族譜。且請序于余。余多鐵氏能孝友于家。且  
嘉率吾公能篤于水源木本睦族親親。以身爲子孫。  
倡其將必有後也。是爲序。

得一道人曰。短篇中含蓄蘊藉。皆自至性中流出。較  
他作長江大河浩瀚汪洋者。別有一種雋永之妙。  
黃叔威曰。佳文字數語堪傳多者。買菜求益耳。

代高京兆盛京通志序

聖天子御極之二十有二年。武功震疊。文教肆訖。幅幘式廓。百度咸熙。職方輿地之書。直省漸次修舉而

盛京以

龍興

重地。值余承乏作尹。爰董其事。竊惟遼左古營州之

域。星躔箕尾。襟山絡海。內屏神京。外控大漠。固東北一大都會也。明季設鎮遼陽。輪蹄輻輳。烟火萬家。阡陌繡錯。然而地限鴨綠。部附青齊。學士大夫或略焉。勿志。或志焉。弗詳。豈非闢鴻圖而勒鉅典。端有待於

太祖以神武肇基  
開天立極之聖哉自我

太宗蕩定全遼

世祖奄有六合乃進陽藩衛爲

盛京據險拓疆區畫州郡環邊內附執玉帛願爲臣妾

者億萬計版圖所隸較諸直省爲雄而從

龍之王侯將相後先頂背相望郁郁乎洋洋乎地靈人傑

何以尚茲然而郡邑率皆締造編氓半多招徠遼徼  
遼。關。典。籍。罕。稽。金。戈。鐵。馬。之。餘。城。邑。廓。然。改。觀。昇。平。

日久山高水清。欲訪遺老詢故事。而不可得。此余所以特疏請書傳。以備考徵。蓋兢兢乎其難其慎之也。嗣奉

詔

會同鎮帥合烏喇寧古。詳加稽訪。勒成全書。自是三韓以北。故都舊邑。斷碣遺碑。靡不搜剔而內地編戶所隸。二三有司。亦咸悉心諮諏。耆舊拮據異聞。逾年而規模略定。蓋紀載所及。聲教之區。自西南暨東北。五千餘里。書契以來。未之有也。孔子曰。吾猶及史之闕文也。太史公紀五帝曰。不離古文者。近是今日者。

次獻邈矣。然按耳目所睹記。雖纖悉不能盡登。而釐其大綱。存其疑似。則山川之險隘。疆域之區軫。民風物產之淳醜。肥瘠。軍實邊防之利弊。廢興可按籍舉也。抑余又聞之。郡邑誌乘。非徒詳其土物資聞見而已。固將洞形勝要害。以固苞桑。攬風謠以徵政教。核其草木蟲魚。以通貨利用。則志也。而治道具焉矣。余受事以來。方汲汲乎鴻鴈之未寧。戶口之未蕃。農桑之未廣。絃歌之未遍。亟與同事諸君子。杜苞苴。絕耗蠹。拊循噢咻。以培元氣。郡邑學宮。獨捐俸以次修葺。

蓋庶幾豐岐根本之地烟火桑麻盛於曩日英髦蔚起踵武

國

初令天下萬世知

國

家武功文教赫濯覃敷如此其遠也是有司之責也

夙夜砥礪方謀其不逮適叨

簡命

入佐秋官仰瞻

陵闕俯

撫黔黎殷殷於茲土有餘思焉且知後之君子當有

同心也於是爲序其意尚願潤色其成敬藉拜手以

獻焉



得一道人曰此等作竟是歐曾

金陟三先生曰發祥之地說得形勝巍然方見是  
萬世基業太平根本中段渾成無迹而收繳尤  
見關係末復搖曳生姿至其立言簡要運筆古  
蒼俱非俗手能辦所謂文章華國者也

黃叔威曰序誌盛京自與他處不同似此宏偉瑰  
麗之作洵足弁冕蘭臺

代董京兆盛京通志序

聖天子御極以來武功震疊文教肆訖幅幘式廓百度咸熙職方輿地之書直省漸次修舉而臣某以叨

簡命作尹奉天乃奉

詔偕

帥臣督輯通志事書成將拜手獻之

闕廷

謹賜言其端曰帝王以聖德神功膺圖受籙必有王

氣特鍾之地締構鴻基而後四表宅心大業式闡綿寶曆於有永蓋皇天眷命靈祇協應理固然矣

八祖以

武功肇造

太宗文德覃敷

盛

京實爲發祥重地。

世祖統

御萬方。燕京定鼎。遂爲留都。

皇上

神謨睿略。眷念根本之邦。畫疆設鎮。分建州郡。梯航

貢琛。款邊內附者。億萬計。版圖所隸。聲教所敷。書契

以來。未有加焉。臣竊按

盛

京古營州之域。星躔箕尾。拱長白。挾巫閭。襟繞滄溟。

跨馭大漠。蓋居出震之方。扼天下形勝之首也。稽之

肯乘。未有專書。若是乎。地靈獻瑞。鉅典聿煌。端以待

聖矣。

開天立極之。

逖觀往古。治化莫盛於周之成康。雅頌所傳。必推本古公文王岐豐之舊。凡山澤險易之宜。宮室苑囿之富。與夫里巷風謠。昆虫草木。莫不備悉。誠以王業所自。川嶽懷柔。己奠宗社。磐石之基。而祖宗積功累仁。創制立法。皆裕千萬世子孫久安長治之計。今

盛京固我

國。家岐豐地也。是志也。列其山川疆土。則將遡高山荒作之勤。稽其建置經畫。則如述考卜燕貽之旨。搜其

皇上

民風物產則擬進幽風七月之章於以仰副  
觀光揚烈之深心則志而治道具焉矣受事以來早  
夜兢兢

國

朝典制之大請之部臣邊圉諮之鎮帥內地則二三  
有司分歷考究爲圖有九爲志三十有二事舉其綱  
詞規其質訂閱之餘仰見

列聖謨

烈之顯赫昭融深懼固陋不文不能頌揚萬一伏惟  
石渠天祿珥筆之臣必有潤色大業黼黻休明者從  
茲旁搜博覽以期明備焉將畱都名勝之盛與

聖德宗

功並昭垂於奕世斯固中外臣庶所拭目欣瞻也夫  
得一道人曰此作較前作氣較厚而詞采尤覺高古  
筆力在班范之間

黃叔威曰議論高皇體裁縝整琅琅清廟之音不  
同凡響

松鶴老人曰前後二尹不相能前序抑而未登故  
後序用前起語

京城志序

京師者天下之本。陪京者帝業之基也。周公營洛而王居在鎬。有居重馭輕之權焉。光武東都而長安置京兆。有強幹弱枝之勢焉。

國家肇基遼海。京闕之規模已具。

世祖定鼎於燕尊。

盛京以明大業所自始。近奉。

山陵遠翊。畿輔鴻圖。式固寶曆。靈長有光於周漢矣。作京城志。

壇廟志序

帝。王。疑。休。永。命。道。莫。大。乎。尊。祖。敬。天。我。

太祖肇造丕基迨

太宗而饗帝饗親之禮備紹庭陟降垂慶無疆猗歟盛哉

世祖定鼎以後祀典專舉於京師禮無瀆也在

盛京者必志重創始也作壇廟志

得一道人曰語簡而該冠冕莊重允堪爲留都藝文之冠



山陵志序

自古帝王肇興。皆曰天授也。抑地靈亦默贊焉。

盛

京襟山環海。帝業攸興。而鬱葱之氣。則實萃於

三陵。蓋

靈祇所以啓佑我國家也。奠鴻圖於磐石。衍本支於

千億。亦何假卜世卜年哉。作山陵志。

得一道人曰高簡雄渾。

宮殿志序

祖宗神

星官以太微爲天子廷將相執法左右十星環焉。聖首出而折衝翼贊皆天潢玉葉之英殆與周召秉鉞毛畢前驅輝煌先後矣於是

大

政高拱左右十署駢羅而

清

寧之制則擬紫宮之特邃焉上符乾象作覩臣民倚

歟盛哉作宮殿志

得一道人曰極好証據學貫天人庶幾無愧

苑園志序

雅歌靈囿。風美騶虞。聖世飛潛。動植咸沐。禁苑春風。固非極遊觀之娛者已。

盛京山海奧區百物蕃阜

國家祇因山澤自然之利。爲祭祀燕享之供。初不煩土木。以勞民焉。仁儉之風。昭茲來許。何必侈談昆明上林哉。作苑園志。

得一道人曰。雍容博大真盛世文章。

各庄附

古者寓兵於農。有事則荷戈。無事則力耕。以奉上。自井田廢而兵農分者。勢也。我

國

家締造伊始。遼河左右。編戶悉隸戎行。

聖祖不

忍以惟正之供。復煩爪牙之士。於是有各庄之設。皆

內務府司之。而八旗子弟。餘力足以闢草萊。卽分土課耕。不復取其錙銖之賦。於以恤行間飽軍實。廣膏腴。厚積儲。鴻謨惠澤。度越前古矣。今紀其略。附苑囿之後云。

建置沿革志序

禹貢敷土分州。周官體國經野。古今沿革互殊。要因時規其制焉。遼地自遼金襲渤海五京之制。而形勢分明。省郡縣爲衛所。而邊隅狹。

國。家幅幘丕廓。獨重留都。以壯京師之勢。畫州郡以奠民居。相中外而分鉅鎮。

聖謨

宏遠允垂。拱於萬年矣。作建置沿革志。

得一道人曰。有體國經野之識。始堪讀此。莫作文字看去。

星野志序

星野之學詳於甘石。迨漢晉而宮度廣狹各私所見。災祥之術亦紛焉。遼海星分箕尾。家締造以來。鴻圖式廓。躔次未殊。往籍可考也。若夫史家五行所紀。固將稽庶徵以端皇極焉。可無志歟。作星野志。

得一道人曰語簡而該。原本經術與天官家之論較別。

疆域志序

古。帝。王。畫。郊。圻。以。固。封。守。腹。心。內。地。疆。理。必。嚴。矧。根。本。之。邦。卽。係。邊。防。之。重。者。乎。

盛。京。西。接。畿。輔。東。南。濱。海。北。控。大。漠。而。遼。河。左。右。奉。錦。二。郡。攸。分。是。天。造。之。險。以。界。全。遼。矣。綢。繆。疆。圉。屏。翰。神。京。苞。桑。之。謀。或。在。形。勝。之。外。蒞。斯。土。者。何。可。忘。歟。作。

疆域志

得一道人曰含蓄蘊藉皆具卓識

山川志序

周頌稱懷柔百神。及河喬嶽。帝王受命承乾。而羣靈  
協應有自來矣。

盛

京源鍾長白秀。結巫閭。滄海南迴。混同東注。王氣所  
萃。在乎山川。不信然哉。卜瀍卜洛。締造維勤。陟嶽在  
原。貽謀斯遠。

祖功宗

德將與河山共永於萬年矣。作山川志  
得一道人曰頌揚有體字字皆經術之文



城池志序

易稱王公設險以守其國。故金湯旣固。萬世苞桑之計。寓焉。遼地自遼金以來。雉堞屹然。相望明省。爲衛所。而規模非舊矣。

國

家相形勢而復州郡。此外遺闔故壘。兵民相保。聚居大抵皆邊防守禦之資也。當萬國車書之日。綢繆風雨。又安可不詳歟。作城池志。

得一道人曰。留都城堡頗多。任其傾頽。不復修葺。古人設險苦心。莫問矣。序中含蓄皆老成謀國至言。

關梁志序

盛。京。襟。山。環。海。控。制。中。外。昔。人。據。險。立。關。架。川。成。梁。固。以。通。行。旅。資。利。涉。哉。蓋。亦。邊。防。所。亟。重。也。

聖。世。遐。邇。晏。寧。貢。琛。萬。國。邊。門。之。設。僅。取。封。植。抑。固。有。深。焉。者。歟。至。若。舟。楫。以。佐。濟。川。之。具。運。艘。以。省。

輪。輓。之。勞。是。又。經。畫。之。周。悉。者。也。作。關。梁。志。

得。一。道。人。曰。意。在。言。外。經。濟。可。想。

驛站志序

郵驛之設。所以通星輶資行旅也。

盛京東踰寧古。西抵京畿。南達朝鮮。較之明世。幅幘式廓。故站道遠近疎密。亦稍殊其制焉。今則循黑水而北。爲屯鎮往來之衝。疆圉日弘。置郵亦加於舊矣。若定經費之常。嚴擾驛之禁。良法美意。蓋亦有可傳者。作驛站志。

公署志序

國家分職授官。設公署以爲臨民報政之地。匪獨肅觀瞻而已。蓋顧名思義之意寓焉。

京

師公署之制詳于

陪

京事之繁簡殊也。

陪

京之制較重于他省。體之尊卑異也。拱護

陵

闕

翼

贊

皇猷

敬爾在公。可無念歟。作公署志

得一道人曰的確不可易

職官志序

書稱時亮天功。詩言靖共爾位。重官箴以明職守也。前代陪京卿寺皆備官率視爲養閑之地。

國家百度維新尊

盛京以重根本量地之遠近而分鎮帥酌事之繁簡而留諸部郡邑長吏師儒亦裒生齒人文爲損益焉。豈非慎名器以程實課功歟。若夫時亮靖共之義百爾君子其勗之矣。作職官志。

得一道人曰職官人所略此却說得關係使人警省。

學校志序

漢高以太牢祀孔子。實開炎精四百年之基。我

太祖締造鴻業。

太宗百度肇舉。乃首尊

文

廟。建學宮。猗歟偉哉。較太牢之祀有光焉。宜乎將相名臣先後蔚起于今日也。

世祖重道。右文。逮我

皇上

而師儒之制備比戶誦絃。留都人才蔚起。蓋

聖祖規

模弘遠矣。作學校志。

田賦志序

考禹貢冀州賦上上錯而田中中。青則田上上而賦中上。遼地分冀青二州之餘。物力地宜。古今不甚相遠也。當遼金定鼎。郡縣鱗次。土闢壤饒。田賦爲諸道冠。後乃土廣人稀。豈非時使然歟。今八旗開墾稍增。招徠之民未廣。鴻鴈甫集。逐末滋多。懲游惰而勸農桑。知本計者加之意。已作田賦志。

得一道人曰。畱心時務。通達治體之言。自與文人迥別。

稅課附

盛京兼山海之饒。逐什一者。擅奇贏而力作者寡。知本計者。恆以土滿爲虞。而諸稅設焉。責成各異。而增減不齊。要因時制宜也。然而橫征則必禁焉。蓋恤商之仁。抑末之政。並行而不悖矣。

官庄八旗田畝附

古者公田之設。民拮据以奉其上。因徐計其身家。意良厚也。賦稅密而田盡。屬於下。勢使然乎。

盛京土滿人稀。設



皇庄

以供粢盛王食之需設官庄以供使命廩餼之備凡以罪入官者田之人皆南畝而儲蓄有資不失公田遺意至若八旗分田不計土貢之入而曠土漸闢飽騰可恃是又良法之可傳者也

皇庄

司於內務府故登苑囿之內官庄轄于戶部故與八旗田畝同附田賦之後

得一道人曰草昧經營事多特剏此乃皆就有關治道處發揮出來事事俱有着落當年苦心可不負矣

風俗志序

禹貢不紀風俗。謂轉移化導。由乎上耳。及讀二南。幽風。則家人婦子情事。纖悉必詳焉。豈非王迹肇基。其敦龐之氣。忠愛之風。保泰圖治。固未可忘歟。遼地箕子教化之遺。故老稱。

祖宗締

造以來。其勁質少文。慷慨蹈義。流風如昨也。今且絃誦遍矣。導之禮讓。母漓其真。殆蒸蒸丕變哉。作風俗志。

得一道人曰。語氣高渾。而用筆抑揚盡致。

祠祀志序

國  
古帝王先成民而後致力於神。故有勤事定國之勞。則祀之。能禦災捍患。則祀之。典綦重矣。家。膺。天。明。命。百。神。受。職。常。祀。之。外。禮。有。兼。隆。固。無。非。崇。德。報。功。之。意。歟。若夫紺宮碧宇。郡邑相望。斯亦福善禍淫。神道設教之所不廢也。作祠祀志。得一道人曰語氣抑揚輕重。自見識高筆妙。

聖天

物產志序

周公陳七月也。近取菽麥禾麻。纖及莎雞蟋蟀。豈獨蟲魚歲。蕤足佐風謠。抑豐芑周茶。皆徵祖德也。

子萬國共球地。不愛寶嘉禾。神爵將史。不勝書而發祥。重地羽毛齒革。軍實是資。澗藻溪毛。馨香爰薦。撫厥蕃滋。載追荒作。寧止登食貨之篇。披禹貢之籍。已哉。作物產志。

得一道人曰。典贍風華。莊重高簡。當求之東西京之間。

古蹟志序

遼地自秦漢郡縣以來。歷朝遺蹟。簡冊或不詳。遼金定鼎而京華鉅麗。史乘所傳如昨也。夫商盤夏鼎。博物者猶深考古之思。矧遺墟舊壤。流覽寧無遐寄乎。至前代帝王陵寢。祀典有經。朝勳舊墳。塋豐碑著蹟地。以人重。皆足昭示來茲。是所宜兼及者也。作古蹟志。

感

得一道人曰。筆氣抑揚搖曳。自饒姿致。使人悠然興

帝王志序

自古稱地靈者必推人傑。謂地以人重也。矧膺天命。居天位者哉。故毓聖所自。湯沐垂光。定鼎攸基。京華建極尚矣。自臨潢以金箭造邦。長白以慶雲兆瑞。遼金二祖發祥斯地。肇創神畿。乾元統運。旣以寶曆相承。坤德呈祥。亦遂母儀。婉美史冊。專詳志亦未敢略也。作帝王志。

得一道人曰冠冕稱題詞采極似蔚宗

名宦志序

仕宦而惠愛一方。則父老子弟從而俎豆之。蓋崇德報功意也。遼地漢唐以來。歷宦者多以武功顯。遼金定鼎而定國勤事之臣輩出焉。我

朝

肇興其任。心膂股肱寄者。勲在社稷。名勒鐘簴矣。而畱都之鎮帥卿貳與夫郡邑長吏之循良固將崇祀茲土以風來茲者也。則論定所宜慎歟。作名宦志得一道人曰淡筆亦饒風致。

人物志序

漢祖功臣多由豐沛。光武佐命半起南陽。神聖作而名世。應期天之生才。良非偶也。遼左漢唐以來。犖犖者可指數。

與

朝肇社天。潢貴戚。皆周召畢散之英。而翼贊折衝。攀鱗附翼起者。濟濟焉。豈長白巫閭。蛭蠃磅礴。積久而昌歟。抑天秘其精奇。儲以相授歟。

聖天

子保泰承乾。明良喜起。人才之盛。更非竹帛可勝紀矣。作人物志。



孝義志序

士有百行。君子每樂觀其大。彼經明行修。聲施爛然者。尚已。布衣韋帶之士。孝友篤于家。信義稱于鄉里。主持風教者。表揚恒亟亟焉。若夫委贄策名而疾風勁草。蹈義如歸。較之雍容盛平。服休服采者。其幸不幸固殊。要其至性。未可盡同日語矣。遼海孝義。漢唐以前。因地遠史或未詳。簡冊可稽。輿論可攷。率自遼金以後。云作孝義志。

得一道人曰語有分寸

仙釋志序

志紀物華人。瑞仙釋例得並書。蓋自魏書特志。釋老史氏已爲之權輿矣。夫二氏之學。儒者或不道。然其栖神寧淡。存心利濟。亦有足多者焉。聞名山大川。眞靈所宅。遼地山川。奇奧宣代。有偉人而紀載所傳。若可指屈良以俗敦。眞樸不事語怪炫奇。故也存其一。二以備方外一流云爾。作仙釋志。得一道人曰字字皆有分寸。

藝文志序

尚書稱堯曰文思。舜曰文明。禹曰文命。帝王以人文化成天下。蓋綦重哉。留都自

列聖肇興以來

綸綍所布。皆典謨誓誥之遺。煥乎殆麗。日星而昭。雲漢矣。他若古今屬詞。揆藻亦不乏人。序紀所存。聊資考證。題咏所寄。亦備輶軒。遴其雅馴。附登卷末。聊以廣文治云。作藝文志

得一道人曰。史遷序贊爲千古短篇之冠。然立論間

有偏處此則字字原本經術有關治道而語氣抑揚中皆有分寸風神縹緲蘊藉深厚卓識名言層見疊出平心靜氣讀之自見非過論也

黃叔威曰歷覽諸小序不特體裁瑰麗氣骨堅凝備史家之長而經綸時務卓識宏言尤擅康濟之具先生萬里之行似專爲此一事名山大業託茲不朽不可謂非造物之厚也

承德縣志序 丙寅孟冬

盛京爲

國家根本之邦。承邑實湯沐發祥之地。承邑之志固盛京之大政大綱具焉者也。

聖天子加意輿地之書。部頒以河南通志爲例。奉錦二郡有司躬歷山川。採掇見聞。彙輯呈於京兆。京兆以盛京之地尊于他省。乃兼採明一統志中都興都之例。先京城壇廟山陵宮殿苑囿諸志。而建置沿革以次及焉。書成進于

闕庭既奉

俞旨

而邑乘以待通志之折衷尚未及編次論定而臣某以乙丑之秋知承邑事爰治邑乘舊藁合通志伏而讀之乃喟然嘆興曰是書也固

聖朝

大業之所自始而卽萬年有道之長所由基者乎漢祖得天下於馬上而宗廟祀典未定乃紛更于元成之時唐太宗偃武修文而郊祀之禮未親見陳于馬周之疏

聖朝

締造

壇廟爲先此尊

祖敬

天超越

祖宗宮

祖宗首尊

文

漢唐者一矣。漢武欲取三輔近地以廣上林而東方進直言。唐宗晚作飛山翠微諸宮而魏徵陳十漸。我殿不侈。莛若椒風之麗苑。牧無事。昆明太液之觀此儉德仁風。媲美黃唐者二矣。漢高親祀孔子遂開經術。節義之風。唐初特重府兵實得寓兵于農之意。我廟廣勵學宮八旗分田蠲其租賦文經武緯使人文

聖朝。

謝起士馬飽騰此又跨軼百王範圍千古者三矣人知我

一戎衣而天下大定抑知開創貽謀培養者深而經畫者遠也史遷有云主上明聖而德不布聞有司之過也而王充著宣漢恢國諸篇揚當代之烈其言曰鴻筆之臣國之雲雨也臣是以亟爲編次使我

家鴻筆之臣攬輿地之書而頌颺大業將

德。聖朝。



宗功焜

耀于千萬世小臣敬稽首欣瞻其盛焉

得一道人曰漢唐闕典却爲昭代贊頌張本漢唐盛事更見昭代盛德漢唐大政昭代更超前烈三者俱非過言凡贊頌之文一味獻諛使人生厭此則卓識宏議煌煌大篇使草昧經營一二大事大有生色鴻筆之臣國之雲雨非此孰能當之

黃叔威曰前後莊重得體中段豎議鑿鑿詞兼美諷經濟卓識何減魏鄭公陸宣公耶莫只作文字看去

承德縣建置沿革志序

帝王承乾御曆。必有締構鴻業之基。此岐豐所以光  
于雅頌也。藩自唐以來。始列州郡。至明分爲衛所。我  
太祖龍興定鼎。  
世祖遂尊爲留都。我

皇上式廓鴻圖。畫野分疆。而承德爲陪京首邑。內奉  
陵闕外。控要荒磐石之固。於萬斯年矣。作建置沿革志。

得一道人曰。前序大意已悉。此却從頌揚起見。詞令  
之妙不可言。

承德縣壇廟志序

國家典禮之大莫如饗帝饗親

聖祖締造之初卽隆尊

祖配

天之典

此規模所以光萬代也今大祀專舉於京師而開創

壇壝猶肅

廟貌攸崇儼若瞻

祖宗對越陟降之誠焉屬在臣子寧罄頌揚哉作壇廟志

承德縣山陵志序

漢世園陵皆置令丞重祀事也我

國家

山陵祀

典皆有專官而屬在臣子惟秩尊至三品者始得瞻

謁儀加肅矣承邑以近依

京

闕得瞻鬱葱佳氣而慶萬年

帝業

之隆敢不拜手恭紀其盛哉作山陵志

得一道人曰的確是邑志語簡而莊非大手筆不能也

承德縣宮殿志序

帝王垂裳御極繼離以治而宮闕之制崇焉我

聖祖肇造之初而

大政

清寧並建已巍然有控八荒而御六合之概矣守土之

臣近仰

宸居而益頌

聖模之弘遠也作宮殿志

承德縣苑囿志序

靈囿美於雅歌。上林侈於漢史。遊觀之地。均而王風。霸術何隻然殊也。

盛京發祥重地。山林川澤之利。編氓共之一二。苑牧取供。祭祀燕享而已。初不聞層臺累榭之觀也。仁風儉德。詩人所爲咏騶虞乎。何漢唐以後之足云。作苑囿志。

得一道人曰。頌揚語却又以淡遠取勝。遂覺風神獨絕。

承德縣星野志序

書傳所載燕遼統箕尾二宿之分費直蔡邕陳卓諸家分度之說言人人殊則承邑專屬之度未有以據也夫天道遠人事邇存其概以待言天官者折衷云爾今

聖天子懋建皇極休徵畢協而  
發祥重地佳氣鬱葱昭回雲漢知太史望箕尾而占  
帝業於萬年矣作星野志

得一道人曰此須合通志小序讀之方見立言之妙

聖祖於

陪京爲帝業之基而首邑實州郡觀化之地鎮帥無所不統而邑治之疆界不可不詳也若夫龍蟠虎踞焉建皇極而控萬方豈一邑之形勝已哉作疆域志

承德縣山川志序

聞之有道之世河嶽爲之效靈承邑左東牟而右遼海皆以拱衛陪京匪獨境內名勝徒供登臨之美而已仰高山而遡荒作之勞咏豐水而志燕貽之遠烈何能頌颺萬一哉作山川志

神謨聖



承德縣城池志序

雅歌作豐書稱卜洛帝王宅中設險萬方咸拱極焉。  
承邑爲畱都附郭固漢晉以來所稱爲湯沐之邦奉。  
陵之邑也麗譙雉堞皆。  
望祖規。

畫之餘那居保定萬世金湯規模何宏遠哉作城池  
志

得一道人曰的是邑志城池不可移易

承德縣關梁志序

盛世出入必譏利涉有備凡以察非常通行旅也承  
爲留都首邑內地譏察無事過嚴而川澤遼衍橋梁  
必增修葺焉政之緩急固有經歟若夫舟楫之設以  
代輓輸之勞規畫斯爲深遠矣作關梁志

承德縣公署志序

聖祖開  
天立極設官分職公署星羅久已肅臣民之觀瞻矣  
郡邑先後增置而治事之所規制亦漸備焉豈獨壯  
京闕之規模亦以課亮工之實蹟云爾作公署志

承德縣驛遞志序

承邑西達

京師北通寧古南道朝鮮爲星軺輻輳之區故驛與遞兼設焉驛政主于帥幕其地不可不志也鋪遞邑宰司之主通文檄而已體恤其勞母稽公事或有宜留意者歟作驛遞志

承德縣職官志序

湯沐邑爲發祥重地故歷代留守之官率視京師損益焉

國朝以奉天爲留都鎮帥卿貳濟濟師師居然京闕之風矣大小臣工同此靖共之義所當備列以紀其盛者歟作職官志

承德縣戶口志序

藩自遼金列于州郡而生齒漸繁。明改衛所則皆入伍士矣。

國家尊爲陪京。旗民雜處。今總總而林林者率從龍之裔。荷戈之選而編氓什不二二也。旗籍非邑令所司。志列編戶之數而已。若夫撫循生聚守斯土者何可忘歟。作戶口志。

承德縣學校志序

京邑首善之地。奉天學校建自

聖朝開創之初。首尊

至聖以開萬年之文治。甚盛典也。我

皇上崇儒重道。

御書萬世師表。頒於學宮。所謂以治統而承道統。作君而兼作師者歟。萬國同文而奉天學校爲權輿焉。猗歟盛哉。作學校志。

得一道人曰的確冠冕真臺閣氣象也

承德縣選舉志序

雅之咏思皇也。曰生此王國。蓋發祥之地。河嶽鍾靈。信矣。

聖朝

從龍之彥。京邑爲多。而建學設科以來。奮武揆文。其

拔於主司而登於

天府

者。何一非我

祖宗

菁莪棫樸之遺也。詳其姓名。固有光於曩代者。歟。作選

舉志。

承德縣祠祀志序

聖朝

詩稱懷柔百神帝王受命承乾羣靈效職固也

締造以來凡崇德報功諸大祀宗伯典之邑令所職壇壝而已其他里巷祭賽之區皆假福佑民之意倘亦有宜存者歟作祠祀志

國

承德縣物產志序

承自遼金時建邑號樂郊謂地宜肥衍物產充牣誠沃土也

聖朝

發祥斯地。蜺。蜺。動。植。咸。沐。茂。育。深。仁。今。阜。蕃。有。象。矣。



載咏周原不遐思

胆烈哉

作物產志

得一道人曰志物產發出如許大議論何等手筆

承德縣古蹟志序

藩自唐以後列州縣沿革互異故址莫可詳稽而一  
二遺墟廢壘因循舊名者猶可指數蓋俯仰今昔者  
所不遺也至若

國

朝勳舊遺塋其人已往烈著豐碑棠樹猶存峴山在  
望倘有聞風興起者歟作古蹟志

承德縣名宦志序

仕其土而功德在其民則食俎豆之報此名宦之所  
以光祀典也承自遼金郡邑以來稱循良者不少概  
見。

聖朝肇迹而勳勒鍾簾澤被天壤者竹帛不勝紀焉請諸  
天府崇祀以爲京邑之光倘亦所以風勵來茲乎作名宦  
志。

承德縣人物志序

帝王受命發祥之邦必有嵩生嶽降之英應運生於

聖朝

其地豐沛南陽所由盛也。承爲湯沐邑。天潢貴戚。翼贊折衝者。濟濟乎先後相望矣。稽之曩籍。不啻倍蓰而什百焉。豈非名世固有其期乎。作人物志。

承德縣列女志序

聖朝

二南之化。始於王畿。故閨閣之貞。亦以觀風化也。風勵貞節。必表其閭。承邑首善。自縉紳以逮介士。編氓之家。栢舟自勵者。比比矣。銘彤管者。或有取於斯焉。作列女志。

承德縣隱逸志序

聖天。

堯舜在上。不乏巢由。潘自遼。金郡邑以來。豈無冥鴻。高舉之士。而記乘罕稽。蓋將偕姓名俱隱矣。子加意闢門之典。明良遇合。疇復賦小山叢桂者乎。志闕其人。倘遇于尋常耳目之外。云爾。作隱逸志。得一道人曰真空中樓閣也。

承德縣流寓志序

遼左爲漢世諸賢避地之區。而潘至遼。金始列州郡。諸賢轍迹罕及焉。

聖朝

尊爲陪京。賢人達士。生于下國。願觀光者衆矣。風塵之表。倘有王彥。方管。幼安其人者乎。他日當爲茲土光焉。作流寓志。

得一道人曰。自命不淺。

承德縣方技志序

聖朝。志乘不遺。方技豈宋斤越鐔。因地而良。攬方輿者。有必稽歟。承邑往代。不乏偏長之士。而紀載鮮徵。論人必觀其大。而藝術罕進。博聞好事之君子。當有補日者之傳紀。丁緩之奇者。爾作方技志。

承德縣仙釋志序

志紀地靈人傑而山川瑰異之氣。或鍾爲仙釋者流。史乘列之廣異聞也。遼左畸人間出而承邑二氏之卓者寡聞。豈嵩生嶽降盡爲廊廟之選乎。序以例及人。則闕焉作仙釋志。

聖朝

得一道人曰妙論解頤

承德縣藝文志序

聖朝

締造之初卽崇

文廟以尊

至聖識者謂萬國同文之基在是矣迄今

綸緯所著炳如日星而騷人墨士上國觀光攬帝京以  
名篇望上林而草賦人文化成固赫奕千古哉作藝  
文志

得一道人曰邑志而京城在焉卽通志之弁冕也妙  
在篇篇是邑志篇篇不襲通志却又篇篇可作通  
志弁冕至其名論宏議皆見經綸碩畫而用筆縹  
緲悠揚復饒一唱三嘆史遷諸小序後此爲獨步  
矣

代海城令海城縣志序

聖天子垂裳御極萬國同風八荒共軌乃

勅直省修輿地之書

盛京先後有司彙輯見聞進于京兆京兆上之

甯

小臣某以乙丑之夏知海城邑事乃取邑乘舊藁正

之以通志所裁定者編次爲書乃知海邑之志較之  
他省爲最難而修是志者較之他省宜最慎而志書  
之成其關於國計民生者正非小補也天下郡邑志  
乘皆有成書古今之沿革山川城郭之遠近人物之



多寡攷証者不一書修纂者不一代增補潤色之而已海邑明季隸於衛所今明一統志所載十未舉一二也

聖朝  
龍

締造以來經畫建置無非太政所關而從之將相名臣竹帛莫罄加以疆域寥廓民多招徠縉紳乏著述之書諮詢鮮耆舊之老修志之難莫難於是矣京兆臣既受事分檄有司親履山川稽其道里詢其源流悉取耳目所經而傳訛附會之說不敢登於紀載至於

朝勳舊特爲請之

天。府。以。待。核。實。而。未。垂。於。不。朽。焉。庶。乎。其。難。其。慎。傳。信。  
不。傳。疑。之。至。意。哉。雖。然。志。之。爲。書。非。徒。紀。其。疆。土。之。  
殊。物。產。之。繁。博。耳。目。資。聞。見。而。已。固。將。攬。形。勝。以。固。  
苞。桑。採。風。謠。以。稽。政。教。核。其。草。木。蟲。魚。以。通。貨。利。用。  
蓋。志。而。治。道。具。焉。矣。海。邑。負。山。環。海。爲。陪。京。南。障。之。  
咽喉。土。沃。而。泉。甘。水。陸。珍。錯。聚。焉。元。虞。集。築。堤。課。耕。  
之。法。陳。思。謙。牧。養。之。利。後。世。豈。無。可。師。其。意。而。變。通。  
之。者。乎。然。則。蒞。茲。土。者。相。時。度。勢。加。意。撫。綏。使。編。戶。

日增榛蕪日闢富庶之餘廣勵庠序將見風俗益淳人材蔚起庶幾

發

祥之地與周之豐鎬漢之豐沛比隆則是志之成其裨於國計民生者甚鉅且重也是以夙夜敬虔兼述其意知凡蒞茲土者當有同心焉

得一道人曰邑志却具許多經濟非平日留心治道何以得此此等文字總非經生可及

海城縣建置沿革志序

帝王畫野分疆爲都會爲郡邑。要因地制宜也。海邑自渤海得列于五京。嗣是而州縣衛所因革者屢矣。聖朝始定爲陪京之屬邑。觀其襟環溟渤。列峙羣峯。允帝鄉屏翰之要區哉。作建置沿革志。

海城縣星野志序

金於澄州置縣曰析木。今境內故城猶在海邑屬析木之分也。尚矣。遼金雖設邑而皆隸于東京。史傳所紀祥異專屬海邑者蓋寡焉。

聖天子臨御以來。豐登屢奏。守土之臣。書大有而慶昇平。已爾作星野志。

得一道人曰星野諸序皆確不可易

海城縣疆域志序

聖王建國疆理必詳。後世郡縣封域之嚴。猶昔也。海之稱京。稱府。稱衛。其幅幘廣狹。前代莫可稽矣。

聖朝爲陪京屬邑。而邑令及守尉各有專城。所轄或互殊焉。豈非以形勝當水陸之衝。責成固特重歟。作疆域志。

海城縣山川志序

遼左山川縣亘而海邑則枕羣峯而跨溟渤固泱泱  
乎大觀也。渤海列於五京豈非以山河形勝然哉。  
聖朝爲陪京屬邑屹然壯畿南之鎖鑰焉。豈獨登臨選勝  
者足供流連哉。作山川志。

海城縣城池志序

海邑渤海時爲京華之地幅員九里明省爲衛所而  
規模非昔矣。

國

朝新城之設固欲拓其制乎。邑治所屬率多遼金郡

縣今遺堞相望也。生聚撫循固近畿富庶之邦哉。作城池志。

海城縣關梁志序

海蓋爲遼左要區。故前代於二衛接壤置關。今皆爲內地。則省之。然其址不可不記也。邑治濱海。川澤蔓衍。利涉之備。不可不周。及時成梁。濟以舟楫。何一非利民之善經哉。作關梁志。

海城縣驛遞志序

海邑古邊要水陸之衝星輶羽檄郵置必嚴。

國朝爲陪京屬邑有司奉行文牒而已鋪遞則詳其數而舊驛之地亦記以備考稽焉作驛遞志。

海城縣公署志序

國朝定鼎之初海邑公署之設較他邑爲先然規制簡樸取足臨民報政而已守尉治事之所別有專城固因地形爲要害之鎮乎分誌其地俾各敬在公之義已爾作公署志。



海城縣職官志序

遼海自漢唐郡縣以來長吏不勝紀矣。而前代載籍寥缺。姓名多不傳。

國

朝建邑。先後有司。猶可按籍舉也。列其姓名籍里。使父老子弟指而數之曰。若爲循良。若爲異等。斯則昔賢志乘題名之意歟。作職官志。

海城縣戶口志序

國南海古京華之地戶口蕃滋元明以來已非其舊矣  
朝爲新造邑旗民雜處編戶率多招徠而土著什不  
一二焉然地擅山海沃區倘司牧畱意生聚何難觀  
蕃阜之風哉作戶口志

海城縣田賦志序

遼左古稱沃壤元虞集請用築堤課耕之法則海邑  
爲最宜

國朝建邑以來本業者寡今力作有加矣闢曠土爲膏

柳崖山房文集  
臆登編氓於富庶是良有司之責哉作田賦志

海城縣學校志序

國朝絃誦之化遍于海隅日出之邦況海城爲

盛京屬邑聲教最先者乎建邑之初卽立

文廟以尊

至聖而庠序猶統於奉天我

皇上

乃增設師儒從此人文蔚起古人稱海濱鄒魯將於  
茲邑有厚望焉作學校志

海城縣選舉志序

古之用人也。取之不一其途。近世科目之設。蓋示公也。遼金有進士之科。而海邑舊乘闕如。姓名失紀。明爲邊衛入選者。可指數焉。

聖朝廣庠序。特置師儒。從此棧樸菁莪。彬彬蔚起。于曩代庶有光歟。作選舉志。

海城縣風俗志序

史稱遼左自箕子教化以來。門戶不閉。婦人貞信。海邑蓋猶近古哉。

聖朝締造培養教化之餘而風加厚矣我  
皇上慎庠序增師儒絃誦蔚起彬彬乎質有其文盛世之  
風歟作風俗志

海城縣祠祀志序

邑令膺民社之任祀事必致虔焉海自建邑以來壇  
壝之典先後加肅矣其他里閭報賽之區或間以二  
氏焚修之所既相沿以爲俗則其地亦有必稽焉作  
祠祀志

帝鄉。

海城縣物產志序  
天。地。之。生。物。海。爲。大。邑。以。海。名。珍。錯。之。繁。夥。殆。不。勝。  
紀。也。而。加。之。山。谷。蜿。蜒。林。麓。縣。巨。蜚。走。之。奇。芸。生。之。  
廣。生。節。以。道。豈。獨。擅。一。邑。之。富。饒。蓋。允。  
之。外。府。哉。作。物。產。志。

海城縣古蹟志序

遼。左。自。郡。縣。以。來。京。華。之。盛。州。郡。之。富。與。賢。人。達。士。  
遺。蹤。之。可。傳。者。襄。平。爲。盛。海。邑。則。次。之。然。山。高。水。清。  
故。址。之。可。舉。者。什。得。一。二。也。蓋。典。籍。之。闕。略。久。矣。遺。

編所紀故老所傳兼收勿棄其詳以俟博聞者之考稽焉作古蹟志

海城縣名宦志序

考史傳遼左不乏循良之吏大抵功德在全遼者多而邑令不少概見焉

聖朝宸聰海爲陪京屬邑畿輔有司果其政聲嘖嘖固當先徹而父老子弟所急欲俎豆之者也守土之臣可毋加勗歟作名宦志

海城縣人物志序

古之稱人才也。必曰川岳之英。況山海之間。氣所鍾。豈無命世而特起者乎。遼金以前。史冊不概見。朝定鼎。揆文奮武。名垂天壤者。竹帛不勝紀焉。請之天府。國祀之鄉賢地靈人傑之盛。固有其時歟。作人物志。

海城縣孝義志序

里巷匹夫皆具至性。海雖一邑。豈乏修子職於家而節義表于當世者乎。明易郡邑爲衛所。記乘闕如事。關名教而姓名湮沒。主持風化者所急宜搜求而表。



章之者已。諮之博聞訪之故老。當續爲之傳焉。作孝義志。

海城縣列女志序

閨閣之姿。苟具天地清貞之氣。亦遂與賢士大夫共垂于不朽。海邑風爲近古。前代栢舟勵操者。當不乏人。而紀乘莫徵。有心風教者。所爲興感。已紀其傳者。尚以俟博聞君子之廣稽焉。作列女志。

聖朝

海城縣隱逸志序

遼左爲漢世諸賢避地區之。泉石烟霞。當不乏其選也。海邑文獻闕如。薦紳尚多失紀。況冥鴻高舉者乎。多應運之賢。際明良而矯語巖穴。則非其時也。畸人高士。當有非耳目所及。覩者乎。存以俟焉。作隱逸志。海城縣流寓志序。

士君子行誼表乎當時。聲稱垂之後世。卽其所過之地。僑處之鄉。後人樂稱道之。以爲美談。如王管諸先生。是已。史傳稱漢世諸賢避地遼東。而海邑于襄平。

爲最近倘轍迹所不遺乎抑達人賢士世固樂借之  
爲光寵也作流寓志

海城縣方技志序

形下謂器形上謂道術藝之工何地無之海文獻寡  
徵賢士大夫不無湮鬱則一節之士亦存以俟之可  
耳作方技志

海城縣仙釋志序

名山大川之氣鍾于偉人傑士。以其餘發爲瑰異奇詭之姿。則二氏之卓卓者是已。境內遼世置邑曰仙鄉。丹竈之事。烏知其有無。而史傳且豔稱之。是亦不可略也。作仙釋志。

得一道人曰。全得空中樓閣之妙。此九妙在鏡花水月。

海城縣藝文志序

古者輜軒之採博及風謠。蓋以徵政教考風俗也。海

邑自京華而郡邑豈乏摘奇採藻之流而遺篇卓卓者不多見何哉

萬國同文而陪京屬邑觀光爲近他年人文蔚起知有光于前代矣作藝文志

蓋平縣志序

聖朝。

邑之有乘。所以辨封域。稽疆土。採風謠。資政治也。天下直省郡有成書。家有紀載。故纂述輿地者。率濶色前編。或詢之故老。參酌時宜。而志已具。蓋之爲志。則異是。蓋爲奉天新造屬邑。改衛所而州縣。輯流寓而編氓闢榛蕪。而阡陌何一非我。規畫大經。則其事重而幅幘數百里。山川縣亘輪蹄罕經。叢哲既鮮。成書閭井。率多招徠。欲從遺老。問故事。而不可得。則其事難。既重且難。而欲裒輯見聞。綱

釐目舉以備一統志之參稽。柰何不兢兢乎慎之也。慎之維何。曰傳信不傳疑而已。遼左自唐宋以來。其山川郡邑。南朝士大夫耳目所未親。則欲考訂前聞。舍遼金二史。皆無可據。此信之可傳者也。

聖朝  
天府

肇興王侯將相。頂背相望。名書竹帛。績在旂常。以俟之考稽。而里巷之傳。未敢擅登於紀載。此存以有待者也。其他如山川。或以今昔而異名。鄉井因方言而各異。傳訛改易之故。既無據以參稽。則皆疑之可闕者也。

盛京通志成於康熙二十有三年其時州縣有司先後  
掇集聞見以待郡志之折衷而邑乘未得輕爲釐定  
小臣某以乙丑之秋作令茲土乃爲之先後論次仰  
見

聖朝幅幘之廣規模之鉅。

聖功宗德之隆私慶爲陪京之屬邑得從守土諸臣後拜手  
以頌揚其盛云

得一道人曰簡要不煩而大意已舉可爲作通志者  
之法



蓋平縣建置沿革志序

聖朝

蓋邑古辰韓地。漢唐皆隸州郡。明則衛所分焉。  
定鼎改衛所爲郡縣。蓋雖一邑。居然馮翊扶風之重。  
矣。襟環山海。屏翰陪京。規畫何宏遠哉。作建置沿革  
志。

蓋平縣星野志序

自甘石有星官之書。至費直陳卓而分度不一。要以  
僧一行兩戒之說爲定。蓋邑在

盛

京。統屬箕尾。其分度廣狹靡所折衷。存其槩而已。夫

相嶺山房文集  
天道恒與人事相表裏故一邑之休祿必書而一二紀載所及亦志五行者所必稽也安可遺歟作星野志

蓋平縣疆域志序

王者無分民而有分土故畫疆經野雖一邑必詳焉蓋旗民雜處邑令所治守尉所轄廣狹各殊尤所宜釐舉者也若夫負山環海爲陪京南障之咽喉倘亦有可稱述者歟作疆域志

蓋平縣山川志序

盛

京。山。海。奧。區。而。蓋。邑。爲。萬。山。環。拱。百。川。朝。宗。之。地。

聖天

子。加。意。輿。地。之。書。有。司。皆。登。巖。陟。巘。躬。親。探。訪。凡。前。

代。輪。蹄。罕。經。簡。編。所。未。及。者。靡。不。登。諸。紀。載。偉。哉。表。  
裏。河。山。允。壯。陪。京。形。勝。於。萬。年。矣。作。山。川。志。

蓋平縣城池志序

蓋。牟。在。唐。世。號。堅。城。豈。非。以。地。形。要。害。使。然。歟。今。城。  
仍。明。舊。猶。唐。遺。址。也。境。內。故。墉。舊。壘。多。遼。金。郡。邑。之。  
區。倘。加。意。生。聚。使。烟。火。桑。麻。相。接。固。陪。京。一。大。都。會。

哉作城池志

蓋平縣關梁志序

蓋。邑。萬。山。縣。亘。衆。水。分。流。故。昔。人。據。險。立。關。因。川。成。梁。皆。要。害。之。衝。防。邊。守。禦。之。地。也。

國。家。尊。奉。天。爲。陪。京。則。爲。內。地。屬。邑。關。梁。祇。仍。其。舊。而。已。要。地。或。因。時。爲。重。輕。而。建。置。所。自。或。有。宜。詳。者。歟。作。關。梁。志。

蓋平縣驛遞志序

國家設郵驛以通使命往來。郡邑皆慎其事。期無悞公也。今蓋邑非往來之衝。而前代置驛皆省檄書傳送一二鋪司事耳。鋪遞既列其數。其舊址亦存以備考稽云。作驛遞志。

蓋平縣職官志序

古人仕其土。則志乘紀其名。廉能循卓。父老子弟。得而指數之。亦以示勸戒耳。蓋邑舊乘闕如。

國

朝始改衛所爲郡邑。凡吏茲土者。其流風遺蹟猶在。

人耳目間也。列其姓名籍里，倘亦思其有可傳者，歟？  
作職官志。

蓋平縣學校志序

有學校而後有人才，觀於文翁之化，固宜以學校爲  
首務矣。我

太宗建

文廟於奉天，而遼左人士興于學。我

皇上

崇儒重道，蓋邑近乃增置師儒，從此棧樸菁莪有光  
於往代矣。作學校志。

蓋平縣選舉志序

詩書之稱人才也。曰簡在帝心。言天生也。又曰生此王國。言上所養也。

聖朝肇興。蓋之攀龍鱗。附鳳翼起者。固後先相望矣。自建邑設科以來。或以文經。或以武緯。何一非我。皇。上。壽。考。作。人。之。澤。所。長。養。者。乎。作選舉志。

蓋平縣戶口志序

奉天屬邑之幅幘最廣。考之古蹟。固兼遼金數州之地矣。邑治新設。民多招徠。近海編氓入伍而隸籍者。

益寡生聚撫循固良有司之責哉作戶口志

蓋平縣田賦志序

金完顏齊請合廝罕七百里之地爲民田得膏腴數千頃卽今邑境內地也土著旣寡本業亦稀田賦之入特招徠新墾之區而已

聖天

子加意根本之邦守土之臣勤勤勸課使榛莽皆成沃壤何難觀蕃阜之風哉作田賦志

得一道人曰真經濟人原隨處留心此非文人所能也



蓋平縣風俗志序

遼左性剛悍善騎射務農桑粗習禮固不獨蓋一邑然也

聖天

子加意庠序增設師儒今絃歌漸遍矣家給人足比戶可封端有望于今日焉作風俗志

蓋平縣祠祀志序

民人社稷邑宰是司歲時常祀國典攸隆守土者所宜兢兢也自二氏之教既廣梵宮道宇邑里相望然使氓俗惕于福善禍淫之說倘亦神道設教所不廢

歟作祠祀志

蓋平縣物產志序

蓋。邑。襟。環。山。海。水。陸。之。產。甲。於。遼。左。生。息。以。時。制。用。以。禮。固。饒。足。之。邦。也。

聖天

子。澤。普。六。合。地。不。愛。寶。臨。淵。者。歌。於。物。逐。獸。者。咏。騶。虞。邑。茲。土。者。可。無。紀。其。盛。歟。作。物。產。志。

得一道人曰物產諸志愈出愈奇妙皆不可移易

蓋平縣古蹟志序

蓋在兩漢爲遼東元菟二郡之域。其時置邑雖多。而疆界所屬久矣。簡冊莫可稽也。遼金以後。州縣迭改。或雉堞猶具。或遺址依然。倘亦考古者所爲流連乎。至前代一二遺塋。僅存墟壤。亦志所宜兼及者也。作古蹟志。

蓋平縣人物志序

聞之山川靈雋之氣。鍾爲偉人。蓋邑羣峯北峙。滄溟南注。地靈人傑。固有徵矣。遼金以前。史不概見。

國朝將相名臣。頂背相望。然則岳瀆之靈。亦有待而光歟。作人物志。

蓋平縣孝義志序

志紀物華人傑。而孝義例得特書。所以重本行也。閭里匹夫。皆具至性。而蓋邑自遼金以後。史乘闕如。則今日僅存簡編。與傳諸故老者。固急宜表章。以勵風教者也。作孝義志。

蓋平縣列女志序

天地靈淑之氣鍾于賢人君子亦不遺閨閣之姿。此古人所由傳列女也。史稱遼地自箕子教化之餘女尚貞信則栢舟勵操中饋宜家豈無傳於里閭足光彤管者歟。作列女志。

蓋平縣隱逸志序

蓋邑襟環山海地奧衍林泉禽魚致足樂也。古避地之君子所爲畱連者乎。記乘闕如賢士大夫類多失紀寄興烟霞而姓名猶卓卓在人耳目如公孫先生。

者寡矣。特志之。亦爲山靈之光寵乎。作隱逸志。

蓋平縣流寓志序

蓋。自。管。幼。安。王。彥。方。客。居。遼。左。其。流。風。餘。韻。斯。土。以。爲。美。談。蓋。邑。距。襄。平。數。百。里。諸。君。子。轍。跡。未。知。能。及。否。也。嗣。是。達。人。賢。士。僑。處。當。不。乏。人。而。史。乘。僅。傳。一。二。倘。亦。地。靈。所。借。爲。光。寵。乎。作。流。寓。志。

蓋平縣仙釋志序

仙釋二氏。往往探幽勝之區。爲寄真之地。蓋之山川。縣亘固其選也。故籍所傳。一二可舉。雖無關風教之大。亦足寫方外之奇蹤。搜真靈之別軌。云爾。作仙釋志。

蓋平縣方技志序

志紀人物。亦不遺夫方技。雖藝成而下。然資用則不廢也。蓋牟一邑。豈乏偏材。而往代未列於簡編。則亦存以有待已爾。作方技志。

蓋平縣藝文志序

古者輶軒之使博採風謠所以稽政治風俗也。蓋文獻寡徵其得登於紀載者可指數。今庠序既廣文治益光他日豈無揆藻擷奇輝煌典籍者乎存以俟其盛焉作藝文志。



代奉天諸孝廉送會二改序

明府曾公治承之明年政簡人和士頌于庠父老謳  
于塗而公以治最擢臨川郡佐父老徬徨思攀轅臥  
轍不可得相與謀於某等將述公德樹貞珉垂不朽  
欲得一言頌公某等自念未通仕籍每從京師諸大  
人先生後聞公宦蹟最詳其設施於承者什之一耳  
且慙不文何敢輕以一言頌公父老曰否否公之設  
施于承者什一吾儕之受德于公者且什百吾儕小  
人志恩耳焉用文某等不敢辭相與述所聞於京師

諸大人先生及父老所以戴公者。誌甘棠之愛焉。公八閩望族。弱冠爲詩歌古文辭。名籍甚。甲午登賢書。制義出藝林。爭傳誦。謂真先正大家。其司李於廬也。十餘年積案。公旦夕立剖。嘗覆案已定之獄。活八命。人皆驚爲神明。及改邑。畿輔持廉平。人不敢干以私。甚且鬻田廬以甦民困。民至今頌德。後擢宛平。扶弱抑強。豪猾歛迹。聲震都下。擢臺省。且有日矣。癸亥歲。改邑於承。承故事簡民稀。公下車。值輓漕邊外伐木治運艘。練舟人一二貧氓無以應。當事就公咨便宜。

公調劑有方。公務就而民不擾。非獨承邑晏然。蓋兩郡皆陰受其賜。公爲政簡易。持大體。謂承新造邑。專以休養爲事。先是有積穀之令。勸民捐穀入官。爲荒備。復推陳取新。聽民就官貸而取其息。令初下。值

詔

蠲奉錦二郡租一年。民以故樂輸。及公至。民難之。吏以舊額請。公曰。積穀善行之。則爲常。平義倉不善行之。與青苗等。關外民貧。若歲爲例。後且累吾民。力言于當事。請以上

聞。不得請。公乃稍自蠲穀。餘仍聽民便。然深以爲憾。蓋

凡事必爲承民計。日後利害類如此。雖或行或尼。而承民之子若孫。皆受公賜矣。承學校初設。俗未能重士。猾役且憑凌之。公置役於法。以間獎引士類。以故士知自愛。

盛

京志文獻莫資。十餘年弗就。大京兆督輯甚迫。公乃聚帥幕延同事。日夕考訂徵事者。患於質考古者。滯於辭。凡斟酌損益一折衷於公。未經年而五六千里興圖如指諸掌。竣而公亦以秩滿擢。蓋公歷盤錯。後其治承游刃有餘。而承以新造邑。猝困大役。徵公

聖天

然。承民幾弗獲安枕。今則臨川民何幸而得我公也。雖

子方加意循良。他日書名殿柱。以治最擢九卿者。非他人必我公也。方將霖雨海內。豈獨臨川民受其賜。而吾承以留都首邑。公必將爲。

國

家加惠根本之邦。則今日吾承之父老謳頌之。他日承之子弟世世而俎豆之。續通志者且將舉爲。

國

朝名宦之弁冕焉。則某等今日之言庶幾備輶軒之萬一也矣。

黃叔威曰作應酬文字而不染今時媚寵習氣以  
其用筆渾融措詞大雅也

送官子之蓋州序

至天子崇儒重道文教覃敷從

龍貴胄人詩書而戶絃誦

盛京以豐岐重地文治煥然一新壬戌之春余以謠詠  
蒙

恩貸得謫瀋陽公卿子弟願執經問字者接踵最後乃  
得晤官子官子三謁余不獲比晤則相叩以正誼明  
道之學若不屑世俗紛華功利之爲者余爲一慰嗣  
余設塾官子從余受一經早夜不輟執禮必恭與語

輒領悟析疑問難或發余所未及者。余意官子能相與以有成也。越明年而官子以資從鎮將權稅蓋州。蓋荒瘠濱海之區而隸樞部從事者。遷轉較他曹稍壅人多規避不肯爲。或得則戚戚官子不以動乎其中。惟以稍違其親兼不得就學爲憾。旬日乃詳詢其風俗利弊。鰓鰓以米鹽凌雜。賸商罷民之是懼。推斯志也。庶幾恤民依而知本計者歟。先儒有言曰。爲民寬一分則民受一分之福。官子當有道以處此也。抑吾聞君子於將行也。贈以言。蓋固濱海地也。海之爲



國。國。

德。坎。而。能。下。窈。乎。深。以。有。容。其。源。遠。流。長。渾。涵。洋。溢。  
而。無。溪。澗。湍。激。漂。瀑。之。態。故。能。翕。陰。吐。陽。沐。日。浴。月。  
殊。珍。詭。錯。繁。夥。充。切。其。中。而。爲。利。於。天。下。最。大。吾。願。  
官。子。之。觀。於。海。也。歆。然。以。自。牧。淵。然。其。能。受。從。容。漸。  
漬。盈。科。後。進。而。勿。以。矜。炫。淺。迫。爲。事。由。此。而。他。日。爲。  
家。任。大。事。決。大。疑。勳。在。社。稷。澤。在。民。生。而。不。自。以。爲。  
已。有。庶。無。負。正。誼。明。道。之。初。心。爲。  
家。多。才。之。慶。乎。吾。知。官。子。之。終。能。相。與。以。有。成。也。於。  
其。別。序。以。送。之。

得一道人曰正大之言而不入於迂腐由其才大如海渾涵萬狀故也

金陟三先生曰酷肖昌黎

黃叔威曰首尾開合遊行自如中段灝瀚奇肆恍入貝闕目覩百寶真才大如海也

田肯齋先生詩序

昔少陵處開元天寶時。自許稷契已。乃鬱在下僚。崎嶇劍蜀。其愛君憂國之志。既見於北征諸將諸篇。而觸緒興感。丙穴。郛。筒。黃魚。烏鬼。皆流連寄咏以寫其寥落牢騷之槩。而後世推爲詩家宗工。固豈獨在聲律字句間哉。亦以其性情所寄者遠。非齷齪者比也。肯齋先生中州貴胄。初筮仕。得陪京上佐案牘之暇。委懷琴書。輜軒往來。遂多題咏。蕪城敗堞。衰草寒烟。雪窖之土。床破壁之殘照。咳唾所及。皆成風雅。而鸞

盛

翻。卑。樓。龍。性。難。擾。時。洩。露。於。筆。墨。之。外。或。者。疑。少。陵。遭。逢。板。蕩。宜。其。感。物。多。傷。先。生。際。

時。早。鷹。華。紱。而。寄。慨。過。甚。得。毋。邊。城。風。雪。冰。蘖。難。甘。志。羨。雄。飛。情。傷。鞅。掌。哉。此。未。知。先。生。性。情。之。大。且。遠。者。也。夫。仕。無。問。大。小。期。無。負。所。學。以。行。吾。志。而。己。上。之。處。廟。廊。秉。鈞。軸。弘。濟。蒼。生。次。則。牧。一。方。得。竭。心。撫。字。或。秉。鉞。建。牙。保。障。荒。陲。或。萬。里。節。旄。威。行。絕。域。如。是。雖。風。塵。勞。瘁。其。爲。斯。世。斯。民。者。大。矣。先。生。抱。負。瑰。璋。而。雅。懷。淡。泊。留。都。民。稀。政。簡。上。佐。職。任。鮮。專。趙。張。

天。庭。

之。績。何。施。縞。紵。之。交。寡。合。五。陵。馳。逐。既。所。不。爲。折。腰。  
曳。裾。又。所。弗。屑。雖。鳬。飛。京。闕。表。拜。  
會。不。得。排。閭。闔。而。矢。音。祇。循。故。事。爲。往。返。以。方。剛。之。  
年。車。塵。馬。足。徒。僕。僕。於。冰。天。沙。磧。之。間。故。其。感。托。情。  
深。隨。事。增。慨。人。但。賞。其。道。羈。旅。之。愁。思。寫。邊。荒。之。閨。  
淡。刻。劃。真。切。造。語。幽。闢。而。不。知。其。性。情。所。寄。者。遠。也。  
先。生。氣。甚。和。折。節。文。士。繼。繼。不。厭。焉。天。固。將。使。其。詩。  
學。日。益。精。一。洩。留。都。長。白。巫。閭。之。秘。與。少。陵。入。蜀。之。  
作。並。傳。耶。抑。更。練。其。才。遂。其。養。以。爲。他。時。之。稷。契。也。

先生當必有以自待者吾不敢專以詩諛先生矣

得一道人曰頓挫曲折中却饒典麗藻采又復古茂  
矜貴非唐宋以下所能也求之孟堅蔚宗之間或  
近之耶

孫嘯夫曰其幽咽則椽竹孤吹其委折則武夷九  
曲是得力於廬陵者

代張少京兆祝徐太孺人七袞壽序

昔陶士行都督八州樹勳江表母湛以封鮓還官事  
輝煌史冊李景讓母鄭從子蒞官政可否必白觀察  
浙西蠶卒以靜三公爲晉唐名臣聲施天壤史氏以  
歸母教彤管之榮爲烈余貳尹陪京晤叅佐子厚徐  
公得悉其太孺人懿行乃知閨閣之英古今未嘗不  
相及也子厚總角而孤太孺人勵栢舟操茹荼飲蘗  
者於今四十餘年矣其治家飭而有紀處族戚以和  
教子以義子厚筮仕司城輦轂肅然以最進叅留都

幕留都爲我

國  
家南陽潁川地。比年大工大役頻興。子厚性忼爽。遇  
盤錯遊刃有餘。諸同官樂爲領袖。或事關他曹。彼此  
相軋。子厚片言立剖。衆服其敏。諸當道皆器重之。京  
兆公倚爲重。余每羨其練達。後乃知義方之教有自  
也。蓋太孺人從子。厚蒞官。子厚動靜可否。必以請而  
晨夕承歡進饌之暇。孜孜訓誡。惟是奉公勤職。以無  
負長官倚任至意。以故子厚政聲重陪京。而廉隅自  
矢。敝裘羸馬。有懸魚塵甌風。歲丁卯。陽月之望。爲太



孺人七袞誕辰。諸同官遣倅長安詣余。屬一言爲太孺人祝。余惟

聖天

子方不次擢廉能吏。以風天下。子厚方剛之年。其精勤幹略。不減陶李二公。他日節鉞方面。大有建豎以垂聲當世。金章紫綬。魚軒象服。爲太孺人榮者。正無窮期也。至於閭德之詳。與陶母李母先後競烈。石渠天祿。諸彥方將修女宗之傳。爲史乘之光。則余今日之言。庶備輜軒之萬一也矣。諸君其以余言爲太孺人敬進一觴。

得一道人曰題面最俗文能雅飭如是自是名手

孫嘯夫曰觀良玉而識昆岡之厚挹旨水而知醴泉之深頌閭德者自應寶爾

送孫鳴玉序

余居東之六載。上谷鳴玉孫子。遊學留都。從予執經者數月。以大比屆期辭歸。臨行欲得予一言以別。予惟古君子於將行也。贈以言。微孫子請。予固不可以無言也。昔人謂太史公周遊天下。名山大川。故其交疎蕩有奇氣。孫子由畿輔歷遼西東。踰軍都望碣石。而探巫閭。所見博矣。亦知留都東北有所謂長白山者乎。是固中原學士大夫輪蹄所罕經者也。吾嘗考之圖。乘訪于土人。山蜿蜒磅礴千餘里。高萬仞。其麓

百泉雷轟星迸。匯爲三江。東北爲混同。最大次西南。折爲鴨綠。東南界朝鮮。爲土門。皆盤旋委折。遠者數千里。近者千餘里。而後入海。其所產爲鱣鮪。爲鯨鯢。明月夜光之珠。文貝石砮之屬。奇珍怪錯。不可數計。而溯源於萬仞之巔。一潭而已。潭之四周五峯。實環之。登峯而望。窈乎其深。莫測其涘也。淵乎其靜。非有急湍飛瀑。澎湃奔騰之勢也。而洋溢流行。從容布護。經高岩踰廣岫。隨所觸激。靈氣蒸變。遂極天下之大觀。蓋未嘗不嘆造物者之奇。嗚呼。學問之道。亦如斯。

而已矣。孫子自總角爲制義之學，有聲庠序間，一再不得當，亦嘗加意揣摩，求於王唐諸先正而復，範以時趨，遇學士縉紳輒質疑問難，其于此道或者其庶矣。雖然，儒者讀書窮理，獨爲制義云爾哉！卽以制義論，有明三百年成弘嘉隆名公鉅卿，人不能數，篇篇不能數句，乃知此道之難言也。近世文士沾沾據目前所得，謂可橫絕古今，迨夫得失相際而欣慍生，人已相形而愛憎起，嗚呼！此何異執蹄涔盃勺以侈溟渤之觀者乎？孫子吾知其能免此也。孫子今已悔其

所作假由此而日積月累。安知後之視。今不猶今之  
視昔也。故吾爲道長。白山川之奇。以六字爲孫子進  
曰。深其心。靜其氣。

得一道人曰。山從人面起。雲傍馬頭生。可想其奇崛  
之妙。

孫嘯夫曰。奇峯插天。時有烟雲卷舒其際。

黃叔威見山堂集序

先王之造士也。先之小學之教。使博涉于禮樂射御。書數之途。然後進之大學。使之誠意正心。以求所謂。修己治人之大。故其時士皆文行兼修。明體適用。以副其上之知。戰國秦漢以來。聖教不修。學術漓駁。功利富強。管商申韓之術。紛紜並進。然猶人各抒其真實所得。以自見於上。上亦各就其所長而用之。自近世以制義取士。家孔孟而戶程朱。語性命則抉奧洞微。譚治功則崇王黜霸。雖英奇卓犖之士。不無出乎。

其中而言與行違迂怪貪憚傾險鄙劣往往而是也。是豈所學之不正哉。良以剿襲陳言不由胷臆。是以其真不出也。于是一二英特者流。思爲詩歌古文詞。以自振拔。掇班馬之糠粃。竊陳隋之月露。自詡古學。卑視一切。然其黨同伐異。標榜矜張。謂儒者學術事功。不外此。及試之實用。則空疎寡效。與帖括者均而妄加甚。嗚呼。如是而欲得天下士。宜何道之從。余嘗上下古今。竊以爲論文章者。求其真而已。有真性情。而後有真學問。有真學問。而後有真事功。此不易之



論也。黃君叔威總角時其尊人仲丹先生作令盱眙。因往來游學淮泗間。以詩歌古文詞與諸名宿倡和。不屑爲帖括之學。己而吾鄉張蔚生先生進秩京邑。叔威思一覽長白巫閭之勝。以發其胷中之磊落。策蹇從出榆關。縱觀留都。

宮

闕其意氣可謂壯哉。余方沉牛馬中。叔威來相視。相得歡甚。携其所作示余。屬余一言。余伏而讀之。其詩歌刻意少陵。出入盧李。古文詞則歐曾之亞。余意其技不止此。且未熟悉其性情。不敢輕以一言論定也。

謝曰學與年俱進者也。余馬齒三十有五。叔威長予一歲。吾曹方汲汲務讀書。毋輕言著述。且人苟自視。欲然將日新。方異今日之珠璣。異日視之。皆糟粕也。叔威他日方糟粕之。吾乃執一班譽全豹。何輕量天下士。越明年。予初度。叔威贈予古詩八首。則居然顏謝庾鮑間矣。間爲古文詞。駸駸乎東京而上矣。晨夕過從。議論皆探本原。務經濟。恥雕蟲。弗屑矣。余喜其技果不止此也。而叔威素友愛伯兄。採藥名山不返。每語及淚淫淫盈睫也。性和易坦直。酒後歡呼歌嘯。

皇居

不飭邊幅至受人一言寄托不得當徘徊輾轉不自  
安予益喜其性情之真知其學問之有本也予爲叔  
威歌招隱乃就試留都以大比入長安方將博觀  
之壯麗苑囿倉廩府庫之富饒掇巍科歷館閣與諸  
名公卿大夫遊益深其明體適用之學將所謂有真  
性情而後有真學問有真學問而後有真事功者將  
于是乎遇之詩歌古文辭云乎哉故于其行也爲之  
序因以贈別

得一道人曰有此識見可不作序有此識見方可作

序以古文詞自詡者應當俯首氣骨當在呂黎廬  
陵之間

孫嘯夫曰元黃滿目而浮漂不掃操觚家通病也  
得大篇足以起衰救弊

代送王峨園計部入都序

峨翁王公由計部調留都別駕。經年復以計部內擢。留都紳衿父老不憚千餘里走長安。乞余一言以銘公德者。余稔知公由大行陟郎署。以精勤敏練見器。當事遇盤錯。游刃有餘。其奉使吾閩也。輅車所歷。題咏殆遍。遠人爭重。性慷慨。重然諾。折節貧交。義聲重朝野。願歷畱都未久。何以得此。于紳衿父老願悉其詳。得揜揚萬一也。衆僉曰。關外俗樸。不習文。不能飾詞。爲諛。微公下詢。敢不道其實。遼左爲。

發祥

楊梅山房文集

地編戶率招徠絃誦初起當事鮮重士士亦不復知  
自愛公下車禮遇青衿以間設饌集諸生講課手自  
評閱使習先輩大家又拔其尤者資以楮墨士翕然  
知學公職司權務顧土曠民貧牽牛服賈無幾而旗  
人雜處強豪梗法當事莫敢誰何惟一二窮氓是索  
加以胥役侵漁逐末者且重困公方嚴有威望守冰  
蘖不可干以私親歷閭閻不假權于下旗人究法必  
懲富豪莫敢匿而負販瑣屑悉與蠲去以故頌聲遍  
城市至于羨餘悉入公帑且捐俸葺治官舍使數十

年顏垣傾宇煥然改觀公已內

召特新此以遺後來之同事其豁達之量無我之懷  
見聞所罕也余驚羨者久之因思古將相名臣其勳  
業卓卓在天壤者可指數如晉之陶士行唐之狄梁  
公其節槩幹略公庶幾近之乎陶士行領樅陽時卽  
爲名流推重及都督八州弘獎士類見代之日軍資  
器械牛馬州船皆有定簿自加管籥而狄梁公歷度  
支曹郎時卽按劾不避權貴朝野震肅以公器局他  
日爲

聖天

子任節鉞方鎮入則爲公輔霖雨蒼生其經綸當不亞陶狄二公其設施于別駕者未足騁驥足之萬一也公既新衙署自作記謂凡事不欲以苟且處之卽此亦可覩公之素養矣爰述父老言以贈

得一道人曰惜墨如金不爲諛詞溢美然其人已足傳矣

孫嘯夫曰頌述處無一溢美之言洵乃麗而有創



壽徐元賓序

大中丞金公持節撫七閩。閩之紳士父老子弟。謳誦如父母焉。旣而蒞浙。其苦心倍在閩時。兩浙之戴公。猶閩民志也。未幾以謠詠得蒙

聖恩

徙瀋陽。浙之紳士父老子弟數萬人。號呼攀轅卧轍。車騎不得前。率買舟追送至吳門。猶依依不忍去。好事者爲繪圖紀其事。錢塘元賓徐先生以受公知最深。獨忼慨間關相從。抵遼左。風雨晨夕與俱。予因得讀先生詩若干。且深服其明大義識所依歸也。

孟秋念有七日爲元賓先生誕辰邊城濁酒無可爲  
先生壽者余因捧誦先生詩若文因執爵而言曰昔  
太史公周行天下名山大川故其文跌宕有奇氣而  
蘇子由因欲縱觀京師宮室苑囿之大天下名公鉅  
卿賢人傑士以激發其才思余謂是說固然亦顧其  
人何如耳苟非讀書知大義悲天憫人之意鬱乎其  
中而磊落浩蕩之氣充乎其外雖足遍五嶽亦不過  
寫其山川景物道其騷人墨士羈旅無聊之思已耳  
亦何足傳萬一哉元賓之來也自浙水歷吳門抵燕

市度榆關揖巫閭。碣石縱觀留都。

官闕其于遊可謂壯矣。當其偃仰丘園。積學砥行。一旦受知當世名公鉅卿。方將出有所建。豎以上報。

朝

廷者報稱知己。乃一旦聞公倉皇解綬。單車出境。舉

國徬徨攀留不可。悲歌塊壘。填塞胷臆。及至相從出塞。策蹇迎風。敝裘衝雪。牧馬悲鳴。鈴鐸啓路。與公去國離鄉。蒼生社稷之思。相爲激發。則抒爲文章。當爲怒潮之震蕩。落葉之蕭森。金鐵之鏦鏘。大塊之噫氣。彼其胷中至性大義。當有過人者。謂盡得力于名山。

望天

大川其信然耶否也雖然東南輿望追矣

子早夜痼瘵斯民行名我公節鉞東南且霖雨天下  
元賓亦將抒所學以報知己將退之所謂和其聲以  
以鳴國家之盛者黼黻休明鼓吹風雅將于元賓望  
之敢執余管窺所見以諛元賓之萬一哉敬以是言  
爲君壽

得一道人曰不過作一篇好文字耳而附驥者幸矣  
孫嘯夫曰元兄間關千里冰雪三年得此名作足  
以不朽令人未能免妬

代送張少京兆入都序

留都我

國家發祥重地山川靈秀特鍾自我

太宗文皇帝首崇

文廟將相名臣後先相望暨我

皇上重道崇儒山陬海澨翕然知學近復增設學宮八旗

再行科舉家絃戶誦盛于曩時而能仰承

聖天子作人至意加意培育使士心鼓舞英彥蔚興則實

自我振翁張公始也公早歷郎署勤敏有聲稱及分

憲嶺南以廉明多異政遂膺

特簡已而貳尹陪京

命

下之日東土人士相慶蓋公早歲學識瞻博在長安時優游簿書常與館閣諸名宿倡和風流文藻豔傳遠邇公又虛懷下士好獎借人倫故東人士得從他縉紳先生後稔聞公名咸喜以爲得學識如公虛公廉敏如公後生小子之必有造也八旗取士額甚隘公甫下車卽特疏代請得

旨廣額倍於初關外未能多致書籍公之蒞東卽携計

疏大全以行命諸廣文詳爲講課歲科兩試悉杜苞  
苴請囑而所拔皆知名士國學生鄉試近例由學使  
者錄送前此視爲故事公加意簡閱人競自奮遂悉  
得英雋置前列榜後呼名面訓以經旨奧義文章體  
裁兼以遺卷發學官示諸生皆字櫛句搜詳爲評抹  
苟一語可錄亦爲之咨嗟嘆賞以故受知者樂其甄  
陶卽被擯者亦莫不服其無私爭自濯磨冀得蒙伯  
樂之一顧也

天子疇咨卿貳進公納言將入長安留都人士奔走乞

聖朝。

聖朝。

一言於余以誌公之教育者余惟昔范文正公經略涇原威震西夏而忠宣公克世其家以博大敦篤爲元祐名相史冊以爲美談公尊公大人襄壯公保障西陲功在社稷公復以文教培育畱都他日有爲歌雲漢作人菁莪棫樸者推原所自以公爲稱首誠無愧乎古大臣以人事君者矣況公方強仕之年從此阿衡待卜霖雨鹽梅其勒之鍾鼎而著之竹帛者文正忠宣又豈能專美於前哉敢書此私爲得人慶焉



代朱卽山壽鐵率吾太翁六十序

嘗聞盛德之報。不于其身。必於其子孫。蓋積善餘慶。光大門閭。天道固不爽也。史傳所紀。孝義隱君子多矣。以余所聞。率翁太翁。有可稱述者。翁姪孫式之。爲余午闕所得。士恂恂儒者也。詢其家世。則源自西域。廣寧著姓。後乃隸籍承德。乃祖與率翁太翁。皆以長者見重里閭。率翁天性淳孝。其尊人病篤。翁刲股以進。困而復甦。事繼母盧承顏色。養得其歡心。以陶計術自隱。重然諾。好排難解紛。賙人之急。義俠忼慨都。

人士莫不知山海以東有率翁先生也。歲丙寅季冬之吉，爲翁六袞誕辰。族姓親知以余有通家誼，走長安丐余一言爲壽。余觀晉王休徵以純孝重當世，顧行年六十始以別駕應辟，至晚乃歷三事而後世子。姓登將相者數十族，望冠天下。盛德偉略，顧不早自樹立而晚乃遭逢，且昌其後嗣，彼其積之者厚，光始遠也。留都。

國朝發祥之地，定鼎以來，武緯文經，依附日月而際風雲者，不可數以翁之權奇倜儻，取青紫何啻拾芥。顧

條然自遠寄跡市廛豈天故遲之使待王休徵別駕之年將以大其設施耶抑所謂盛德之報不于其身必于其子孫其積之益厚後嗣之光益遠也今長君允修以太學試州佐而六郎永孚將爲

國任干城之寄子姓十餘孫枝振振皆國器也翁方以黃髮兒齒之年榮膺

綸綍其子人世之福澤功名固可以天道信之而知其不爽矣而余願有進者

國家四十餘年以來畱都之王侯將相不知凡幾其間

令名大業赫奕天壤而不能終始者又不知凡幾也。而公方怡然日乘款段駕鹿車翱翔都市家日益豐。義聲日益著。子姓日益蕃。其視諸君之朝榮暮蹙。又不啻從十洲三島中閱滄桑之人。世是翁之識趣固有大過人者。世俗之福澤功名不足以壽翁而翁之自壽者當無窮期也。試以余言質之太翁翁當欣然以爲知我矣。乃序其意爲翁壽。

得一道人曰祝壽之言却從功名富貴外想出一段曠達自得高出世人處正恐當之者難耳。

送阿蒼霖公車入都序

歲庚午吾門預秋試者六人。錫山吳生在副車。獨阿  
子蒼霖獲雋。既公車入長安。蒼霖以紙屬余一言。予  
惟古君子贈行之義微。蒼霖請固不可無言也。昔范  
文正公秀才時。便以天下爲己任。士登賢書則致身  
之始也。

聖天

子弘開門之典。使從龍子弟皆受經治舉子業。豈徒  
欲其習咕嚕。握鉛槧。工雕蟲技已哉。良以天造草昧  
之始。多嵩生嶽降之彥。不事口耳。皆能爲國家櫛風。

君父

沐雨宏造大業至承平日久必潤澤以禮樂詩書庶  
幾獲明體適用之儒爲億萬世治安之計士生今日  
與斯選者當思何以仰承

君父

意也蒼霖從余兩載於制義差具苦心假從此策名  
南宮逐隊中秘得毋謂一第畢吾事乎尚其思讀書  
窮理砥行修身誠敬以事

寅恭以和僚友以其間究心禮樂兵農之實蹟毋以  
政事之得失徇情面毋以公庭之可否任吏胥毋以  
私意之愛憎樹朋黨從此身躋大僚當思爲

國家持大體培元氣扶植善類激揚風節庶幾蒼生裨  
席堯舜吾

君。

所謂以天下爲己任者諒如斯乎蒼霖天性淳摯且  
恬靜不事聲援倘母以世俗功利之見淆其初而以  
遠大自許於余言或不負也故於其行也贈以言且  
願及吾門者共斯志焉

得一道人曰贈行以言前輩皆有勗勉之語然或偶  
舉一隅或因人規誨此則以絕大議論全副作用  
相期知得此者自是傑士乃竟早赴玉樓又難免

一慟矣

孫肅夫曰敦勉有體



代舜少司馬賀王佐領擢防守尉序

國家景運方亨。則必有負奇猷大略之士。爲效折衝  
禦侮之資。而川岳之氣所鍾。或特盛於一門。有若唐  
之李臨淮。宋之吳武安。皆以弟兄許國。焜耀一時。而  
聲施後世。

盛京我

國家發祥重地。王侯將相。頂背相望。而一門昆季。聯鑣  
並駕。爲

國虎臣。則推我季翁。諸兄弟爲特盛。予曩在長安。佐中

山陵勤

樞卽聞其伯兄治郵傳能以恩卹下驛政釐舉而仲兄董役卒翊衛

於其事公早嫻黃石陰符佐戎帥幕兩度大漠宣威萬里外長安諸公卿咸器重之余旣承乏奉天司馬得與公交益悉其先世事蓋自尊人太翁以孝德見重鄉邦源遠流長子若孫厚食其報公能事二人以孝事諸兄以謹撫弟以慈才識通敏遇盤錯游刃有餘帥幕事有疑難公卽慨任之而豪邁忼爽然諾必果與佐領李公爲總角交數十年膠漆無間以故凡

聖天

自長安抵留都者莫不願交驩公昆仲不啻季布季  
心之諾己也歲乙亥之夏鎮帥遴異材督習火器進  
公防守尉兼轄四旗

子方揚旌瀚海勒銘燕然屬公督貌虎以俟于是留  
都親知咸欲得余一言以頌颺公勲德者余惟昔臨  
淮武安兄弟皆遭時會以取功名今

聖世

萬里車書八荒清晏公之昆季皆負奇猷大略毋亦  
唯是養威標聖使天下咸知留都有方召之臣而一  
門子姓願皆以孝友盛德如晉世王休徵之子若孫

將相名臣相繼斯則天所以爲尊人太翁積善之報而慶之方來者亦正未可量乎畱都親知諸公皆欣然謂余言之不爽也於是乎書之

得一道人曰恬雅更饒精采

壽黃叔威序

遼河折柳喜五年得過鳴珂。燕市停車幸八載再逢。  
叔度時則蓐收令肅。青女粧成玉琯調無射之聲好。  
譜驪歌妙唱璇璣紀降婁之次欣逢麟紱嘉辰幸龍。  
劍之雙逢擬鵲籠而私祝蓋聞九苞雲翮靈響本毓。  
丹山千里霜蹄權奇原鍾赤水循卓則潁川第一淵。  
源亦江夏無雙繡祿占太白之凝精雕弧慶瑤光之。  
煥彩人誇犀角驚辨鼠于髫年衆羨鳳毛擅雕龍於。  
早歲肩吾父子接武騷壇孝綽弟兄聯鑣藝苑乃仙。

伯忽高採芝之興。文星獨馳。挾藻之雄。咳唾珠璣。傾  
泉源之萬斛。心曾海嶽。灑風雨于九天。秋實春華。合  
庶子右丞之勝。清新俊逸。兼參軍開府之長。而且冰  
雪肝腸。恥言阿堵。虹霓意氣。直擬無懷。旣贈紵以定  
交。不爽季心之諾。倘聖門而投止。寧論郭伯之施借。  
鴻筆黼黻廟堂。則典冊高文。相如豈讓。出讜懷運。簪  
軍國則流涕太息。賈傅何慙。君乃抗志羲皇。寄情箕  
穎。龍媒顧影。恥從東野。追風豹變。韜文姑隱。南山致  
霧。偶作臨卣之客。遂爲湯沐之遊。白山墨嶂。層巒藉

任筆沈詩點染黑水千流萬派假韓潮蘇海波瀾間  
訪季布於傭家遂識駸明於堂下從此棊聲琴韻幾  
忘霜滿枝頭茗碗詩筒莫問參橫花底殘杯抵掌二  
十一代興亡短塵披襟三百六旬月日爾乃鹿鳴待  
饗余爲歌招隱之章龍性難馴君仍賦歸田之什願  
板輿幸旋故里而菽水莫佐高堂仁祖可依聊復貸  
仁人之粟荊州舊識何妨投尺素之書簷蔔香中珊  
瑚架筆枕榔樹下翡翠傳箋遂使海藻嶺梅爭投江  
夢蠻煙瘴雨盡人奚囊猶復訪親串於秦關驢背歷

三千險隘考輿圖於朔塞馬蹄踏百二河山孤城楊柳興歌大宛葡萄入譜望白雲於日下長鉞東來瞻紫氣於斗間歸帆南指愧予蠖伏一紀多行吟澤畔之篇蠹蝕半生鮮楓落吳江之句君乃癖同痴嗜寶類枕珍置懷袖何止三年藏篋笥幾於什襲已奪盈川之藻自信前盧思脫潯獄之冤偏殷說項以此故交情深管鮑傾蓋俠慕原嘗解橐爭授棗梨揮毫獨推弁冕奇非長吉昌黎寵以高軒豔謝太冲皇甫增其重價榮逾華袞報愧瓊琚余以邂逅吹簫君乃流



連投轄行當分袂。喜值覽揆。慙霞醴以何陳。敢擬兕觥之獻。佐雲璈而入拍。聊裁駢體之詞。所願卞氏連城。早登瑚璉。瑋璋之選。天孫雲錦。終補山龍。藻火之章。百尺清廟。良材莫擬。黃花三徑。千尋豫章。巨陰何矜。叢桂小山。庶鼎鼐得藉鹽梅。野老共荷含哺之賜。瀛寰共霑霖雨。涸鱗亦資餘潤之波矣。

得一道人曰。思致浩瀚。磅礴而寶光異彩。隨手揮灑而成。由其氣吞五嶽。曾羅萬卷。故能雄快富麗。至此使觀者如入龍宮海藏。但見奇珍瓊異。燦爛奪

目真駢偶中有數之作也

楊道聲曰組五紋而綺錯金百鍊而光生以彌綸  
六合之餘爲雕鏤一楮之技擲米成丹固屬真  
人游戲抑亦子期當前不覺心手交暢也